

萬 有 文 庫

第 二 集 七 百 種

王 雲 五 主 編

劉 賓 客 文 集

附 補 遺

(上)

劉 禹 錫 著

商 務 印 書 館 發 行

劉賓客文集
附補遺

(上)

劉禹錫著

國學基本叢書

劉賓客文集卷一

唐 中山劉禹錫著

賦

問大鈞賦 并序

始余失臺郎爲刺史。又貶州司馬。俟罪朗州。三見閏月。人咸謂數之極。理當遷焉。因作謫九年賦。以自廣。是歲臘月詔追明年。自闕下重領連山郡印綬。人咸曰。美惡周必復。第行無恤。歲杪其復乎。居五年。不得調。歲二月有事於社。前一日致齋。孤居慮靜。滯念欬起。伊人理之不可以曉也。將質諸神乎。謹貢誠馳精。敢問大鈞。其夕有遇。寤而次第其詞以爲賦。

圓方相函兮。浩其無垠。窅冥翕關兮。走三辰以騰振。孰主張是兮。有工其神。迎隨不見兮。強名之曰大鈞。敬以臨下兮。巍乎雄尊。天爲獨陽。高不可問。工居其中。與人差近。身執其權。心平其運。循名想象。斯可以訊。曰。嘻。蒙之未生。其猶泥耳。落乎埏埴。唯鈞所指。忽然爲人。爲幸大矣。上賦其形。七情與俱。嗇智不授。畀之以愚。坦坦之衢。萬人所趨。蒙一布武。化爲畏途。人或譽平之。百說徒虛。人或排之。半言有餘。物壯則老。乃唯其常。否終則傾。亦不可長。老先期而驟至兮。否踰數而叵量。雖一夫之不獲兮。亦大化之攸病。謹薦誠上問兮。俛伏以聽。是夕寢熟。夢遊乎無何有之鄉。抗陛級於重霄兮。異人間之景光。中有威神。巾金甲。

而煒煌。領命一作之使前兮。其音琅琅。曰吾大化之一工也。居上臨下。廉其不平。汝今有辭。吾一以聽。播形肖貌。生類積億。橐籥圈匡。鎔鍊消息。我之司智。初不爾嗇。不守以愚。覆爲汝賊。旣賦汝形。輔之聰明。盍求世師。資適攸宜。胡然抗志。遐想前烈。倚梯青冥。舉足斯跌。韜爾智斧。無爲自伐。鑿竅太繁。天和乃洩。利逕前誘。多逢覆轍。名腸內煎。外火非熱。今哀汝窮。將厚汝愚。剔去剛健。納之柔濡。塞前竅之傷痕兮。招太和而與居。貫以待人兮。急以自拘。道存壺奧。無示四隅。軋物之勢不作兮。見傷之機自無。汝不善用。吾焉嗇乎。且夫貞而騰氣者。臙臙健而垂精者。昊昊我居其中。猶輪是蹈。以不息爲體。以日新爲道。保鱗蜚走。灌莽苞阜。乃牙乃甲。乃殪乃剖。陽榮陰悴。生濡死蕘。各乘氣化。不以意造。賦大運兮。無有淑慝。彼多方兮。自生醜好。爾奚不德。余以驟壯。姑尤我以速老。邪。觀汝百爲。又或不然。赤子哇哇。忽其能言。亦旣名物。幾時躡躑。春耕其邱。投種之日。釋耒而歎。何時實粟。望所未至。謂余舒舒。欲其久留。謂我瞥如。我一子二。誰之曲歟。彼兼葭之蒼蒼兮。霜霰苦而中堅。松竹之皴皺索籜兮。不若櫛笄之可憐。納材葦而構明堂兮。固容消而力完。揚且之哲兮。不可以常然。當錫爾以老成。蒼眉皓頰。山立時行。去敵氣與矜色兮。噤危言以端誠。俾人望之。侮黷不生。爾之所得。孰與壯多。不善處老。問余而何。受教而回。遽遽形開。嚮之威神。孰爲來哉。乃遽衣促盥。端虛滌想。委佩低簪。持簿叩額。而言曰。楚臣天問不酬。今臣過幸。一獻三售。始厚以愚。終期以壽。忘上問之罪。濯已然之咎。心憎故術。腹飽新授。馳神清玄。拜手稽首兮。

南方氣泄而雨淫。地隱而傷物。媼神噫溼。淪色壞味。雖金之堅。亦失恆性。始余有佩刀甚良。至是澀不可拔。剖其室乃出。遡陽眇眇。傳刃蒙脊。鱗然如痂。痂如黑子。如青蠅之惡。銳氣中鋼。猶人被病然。客有聞焉。裹一作密石以遺余。沃之草腴。雜以烏膏。切劑下上。眞質焯見。躊躇四顧。適余周爾謝客。微子之貽。幾喪吾寶。客曰。吾聞諸梅福曰。爵祿者。天下之砥石也。高皇帝所以礪世。摩鈍。有是邪。余退感其言。作砥石賦。我有利金兮。以利爲佩。遭土卑而慝作兮。雄鋸爲之潛晦。如景昏而蝕既兮。與肌漆而爲癩。顧秋蓬之不可刺兮。尙何遊乎。髀髀之外。利物蒙蔽。材人惆悵。俾百汰之至精。蟠一檢而多恙。豈害氣之獨然兮。將久不試而然。彼屠者之刃一作兮。獵者之鋌。不灌不淬兮。揉一作錯銜鉛。日鼓月揮兮。剗腴擊鮮。皖一作燿燿以耀芒。蕪淫夷而騰羶。豈不涉暑而蒙沴兮。鼎用之而成妍。有客自東。遺余越砥。圭形石質。蒼色膩理。剗其鱗。皴滑以滌。瀧如衣。澣垢如鼎出否。霧盡披天。萍開見水。拭寒焰以破背。擊清音而振耳。故態復還。寶心再起。既賦形以終用。一蒙垢焉何恥。感利鈍之有時兮。寄雄心於瞪視。嗟乎石以砥焉。化鈍爲利。法以砥焉。化愚爲智。武王得之。商俗以厚。高帝得之。傑材以奏。得既有自。失豈無因。漢氏以還。三光景分。隨道闊狹。用之得人。五百餘年。唐風始振。懸此大砥。以勗兆民。播生在天。成器在君。天爲物君。君爲人天。安有執礪世之具。而患乎無賢歟。

楚望賦 并序

予旣謫於武陵。其地故郢之裔邑。與夜郎諸夷錯雜。繫乎天者。陰伏陽驕。是已。一無此二字。下同。繫乎人者。風巫

氣竄是已。一有是二字。囂氛浮浮。利於樓居。城之麗譙。實鄰所舍。四垂無蔽。萬景空人。因道其遠邇所得。爲楚望賦云。

翼軫之野。祝融司方。陰迫而專。專實生沴。天濡而零。土洩而泥。氣罕淑清兮。淫氛曠曠。中人體支兮。爲瘡爲瘵。以曠滌煩兮。利居高於物外。我卜我居。於城之隅。宛在藩落。麗譙渠渠。四阿垂空。洞戶發樞。眸子不運。坐凌虛無。歲更周流。時極慘舒。萬象起滅。森來貺予。櫺軒之外。羣山巖崿。岡陵靡陀。勢若相拱。出雲見怪。竊蔚森聳。露夕霞朝。望如飛動。簷廡之下。大江瀕洞。支流合輸。泄入雲夢。羲和望舒。出沒兩涯。涵泳之族。聲牙一作。嗷呀。秋水灌盈。漩石飄沙。流枿軒昂。舞於盤渦。逮及收潦。澹如醪醕。白石磷磷。倒影羅生。蘋末風起。有文無聲。悠遠烟絲。與空蒼然。湘沅之春。先令而行。臘月寒盡。溫風發榮。土膏如濡。言鳥嚶嚶。三星嚶其曉中。植物颯以飄英。雲歸高唐。草蔽洞庭。目與天盡。神將化并。圓方相涵。遊氣香冥。熙熙藹藹。藻飾羣形。枿樹童邱。積空凝青。環洲曲塘。含景曜明。恢台之氣。發於春季。涉夏如鑠。逮秋愈熾。土山焦熬。止水漢沸。翔禽跼墮。哂味垂翅。曦赫敲蒸。陽極反陰。二儀交精。下上相歆。雲與天際。歛苦車蓋。凝矚未瞬。彌漫霑霱。驚雷出火。喬木糜碎。殷地燕空。萬夫皆廢。懸雷綆絕。日中見昧。移晷而收。野無完塊。少陰之中。景物澄鮮。丹葉星房。燭耀川原。夕月既望。矚於丹泉。上鏡下冰。滿塵溜烟。宿麗潛芒。獨行高躔。皓一氣之悠然。潔有形而溢清玄。杳微明而斐聲。想遊目於化先。夜無朕以徂征。金霞暈乎海壖。明星方揚。斜漢西懸。璿柄如墮。半沈層瀾。雞啁晰而晨鳴兮。日荏苒以騰晶。動植瞭兮已分。山川鬱乎不平。復人寰之誼卑。洵

浩浩以營營。追向時之景光。不可驟得。以再更。意華胥之夢還。獨仿像而馳精。日次於房。天未降霜。百卉猶澤。水泉收脉。故道_音脍削。衍爲廣斥。水禽嬉戲。引吭伸翮。紛驚鳴而決起。拾綵翠於沙礫。時時北風。振槁揚埃。蕭條邊聲。與鴈俱來。寒氛委積。萬竅交激。楚雲改容。飛雨凝滴。灑林遞響。浙瀝梢楫。飛電照雪。以騰光。柔蔬傲霜。而透圻。躔次殊氣。川谷異宜。民生其間。俗鬼言夷。招三閭以成謠。德伏波而構祠。投炬_反。尼_呂以鼓楫。象鱸魴而如犧。蟠木靚深。孽妖憑之。祈年祛癘。獨敬祇威。擊鼓肆筵。河旁水湄。薦誠致祝。卻略躑_躑。兒_見靈_光賦。渚居蠡食。大掩水物。苦張餌啗。不可遁伏。顯舉潛絕。晝撞夜觸。設機沈深。如拾於陸。彼遊儵之瑣類。咸跳脫於窘束。雖三趾與六眸。時或加乎一目。亦有輕舟。軒輕泛浮。挖綸往復。馴鷗相逐。莫夜澄寂。嘯歌羣族。愴音俚態。幽怨委曲。逗疎柝於江城。引哀猿於山木。巢山之徒。桴木開田。灼龜伺澤。兆食而燔。鬱攸起於巖阿。騰絳氣而蔽天。熏歇雨濡。穎垂林巔。盜天和而藉地勢。諒無勞而有年。罷士閑人。逸爲末作。求金渚涘。淘汰淺澗。流注瀆沱。繁光熠爚。貪賈來貿。發於懷握。無翼而飛。潤於豐屋。晒耕耘之悒悒。徒胼胝以自鞠。我處層軒。日星迴還。閱天數而視民風。百態變見乎其間。非耳剽而臆說兮。固幽求而縱觀。觀物之餘。遂觀我生。何廣覆與厚載。豈有形而無情。高莫高兮九關。遠莫遠兮故園。舟有楫兮車有轄。江山坐兮不可越。吾又安知其所如。悅臨高以觀物。

傷往賦 井序

人之所以取貴於蜚走者情也。而誕者以遺情爲智。豈至言邪。予授室九年而鰥。痛苦人之天闕弗遂也。

作賦以傷之。冀夫覽者有以增伉儷之重云。

歎獨處之悒悒兮。憤伊人之我遺。情可殺而猶毒。境當歡而復悲。人或朝歎而莫息。夫何越月而踰時。太極運乎三辰。轉寒暑而下馳。有歸於無兮。盛復於衰。猶味爽之必莫。又安得而怨咨。我今怨夫若人兮。曾旭旦而潛暉。飄零日及之萼。日及。檣也。朝生暮落。一名王蒸。出爾雅。倏忽蜉蝣之衣。川走下而不還。露迎陽而易晞。恩已甚兮。難絕。見無期兮。永思。我行其野。農氏桑者。舉柁來鱸。亦在林下。我觀於途。裨販之夫。同荷均挈。荆釵布襦。羽毛之蕃。鱗介之微。和鳴灌叢。雙泳漣漪。薨薨伊蟲。蠢蠢伊豸。遊空穴深。兩兩相比。何動類之萬殊。必雄雌而與俱。物莫失儷。以孤處。我方踽踽而焉如。我復虛室。目淒涼兮。心伊鬱。心伊鬱兮。將語誰。坐匡牀兮。撫嬰兒。何所丐沐兮。何從仰飴。襦袴在身兮。昔園蹉跌。鞶囊附臂兮。餘馥藏蕤。誠□性之全惑。顧童心兮。如疑。曉然有難繼之慕。漠然減好弄之姿。指遺桂兮。能認。遡空帷兮。欲歸。我入寢宮。痛人亡兮。物改其容。寶瑟偃一作兮。絃柱綠。瑤臺傾兮。鏡奩空。寒釭委灰。虛幌多風。隙駒晨轉。窗蟾夜通。步搖昏兮。網黏翡翠。芳褥掩兮。塵化蛩蛩。閱刀尺之餘澤。自巾箱之故封。玩服儼兮。猶具。繁華謝兮。焉從。想翩躚於是。非求憲率與冥蒙。信奇術之可致。嗟此生兮。不逢。徒注視以寂聽。悅神疲而目窮。還抱影以獨出。紛百哀而攻中。系曰。龍門風霜苦。別鶴哀鳴夜。銜羽吳江波。浪深雌劍一去無遺音。悲之來兮。憤予心。洵如行波游浸淫。悵緣情而莫極。思執禮以自箴。已焉哉。苒苒生。死悠悠。古今乘彼一氣兮。聚散相尋。或鼓而興。或罷而沈。以無涯之情愛。悼不駐之光陰。諒自迷其有分。徒終怨於匪忱。彼蒙莊兮。何人。予獨累歎而長吟。

何卜賦

余既幼感力命之說兮。身久放而愈疑。心回穴其莫曉兮。將取質夫秉龜。楚人俗巫而好術兮。叟有嚮卜而來思。乃招而祝之曰。嘻。人莫不塞。有時而通。伊我兮久而愈窮。人莫不病。有時而間。伊我兮久而滋蔓。我聞人宵五行。動止有則。四時轉續。變於所極。一歲之旱。人斯具舟。三月之熱。人斯具裘。極必反焉。其猶合符。予一作子首圓而足方。予腹陰而背陽。胡形象之有肖。而變化之殊常。經曰。剝極則賁。居賁而未嘗剝者。其誰否極受泰。居否而未嘗泰者。又其誰鶴胡不截。鳧胡不裨。夔何罰而蹠蹠。蛇何功而扶持。紛紜恣睢。交作舛馳。似予似奪。似信似欺。孰主張之。問於子龜。卜者曰。招我以粗。問我以微。有天下之是非。有入人之是非。在此爲美兮。在彼爲噍。或昔而成。或今而虧。君問曷由。主張其時。時乎時乎。去不可邀。來不可逃。淹淹兮。孰捨孰操。豕喙之毒董。雞首之賤毛。各於其時。而伯音霸其曹。屠龍之伎。非曰不偉。時無所用。莫若履豨。作俑之工。非曰可珍。時有所用。貴於斲輪。絡首糜足兮。驥不能踰。一無踰字跬前無所阻兮。跛鼈千里。同涉於川。其時在風。沿者之吉。泝者之凶。同藪於野。其時在澤。伊穉之利。乃穆之厄。故曰。是邪非邪。主者時邪。諒淑惡之同出兮。顧所丁之若何。夫如是。得非我美。失非我恥。其去曷思。其來曷期。姑蹈常而俟之。夫何卜爲。言訖。執龜而起。予退而作何卜賦。於是蹈道之心。一而俟時之志。堅內視羣疑。猶冰釋然。

謫九年賦

古稱思婦已歷九秋。未必有是。舉爲深愁。莫高者天。莫濬者泉。推以極數。無踰九焉。伊我之謫。至於數極。

長沙之悲。三倍其時。廷尉不調。行當跂而。天有寒暑。閏餘三變。朝有考績。幽明三見。顧堯之民兮。亦昏墊而有歎。歎息兮。倘伴登高。高兮望蒼蒼。突弁之夫。我未始黃。合抱之木。我來猶芒。山增昔容。水改故防。童者鬱鬱。而涸者洋洋。天覆地生。翁兮無傷。彼族而居。曷之投荒。彼軒而遊。昨日桁楊。信及澤濡。俄然復常。稽天道與人紀。咸一債而一起。去無久而不還。夢無久而不理。何我道之一窮兮。貫九年而猶爾。噫。不可得而知。庸詎得而悲。苟變化之莫及兮。又安用夫肖天地之形爲。

望賦

邈不語兮。臨風境自外兮。感從中晦。明轉續兮。八極鴻濛。上下交氣兮。羣生異容。發孤照於寸眸。驚遐情乎大空。物乘化兮多象。人遇時兮不同。嗟乎。有目者必聘望。以盡意。當望者必緣情。而感時。有待者瞿瞿。忘懷者熙熙。慮深者瞭然若喪。樂極者冲然無違。外徙倚其如一。中紉紛兮若斯。望如何其望最樂。晞慶霄兮。邈阿開如雲兮。天顏咫尺。如草兮。臣心踊躍。扇交翟兮。葳蕤旗升。龍兮。夔略日轉黃道。天開碧落。凝瑞景於庭樹。掬非烟於殿幕。望如何其望且懽。登灞岸兮。見長安紛擾。擾兮。紅塵合鬱。蔥蔥兮。佳氣盤池象。漢兮。昭回城依斗兮。闌干避御史之驄馬。逐侍臣之金丸。望如何其望攸好。宗萬靈兮。越四隩。漢帝仙臺兮。秦皇海嶠。霓衣踊於河上。馬跡窮乎越微。紫氣度關而斐。齋神光屬天而照耀。睨春春以馳精。聳專專而觀妙。望如何其望有形。視蠢蠢兮。窮冥冥。楚塞氛惡兮。蕭關燈明。暈籠孤月。角奮長庚。沙多似雪。磧有疑城。烟雲非女子之氣。草木盡王者之兵。審曳柴之虛警。破來騎之先聲。信有得於風鳥。示無言於旆。

旌望如何其望且慕。恩意隔今年。光度雕輦已辭兮。金屋何處。長信草生兮。長門日暮。篋翠華之儻來。仰
玄天以自訴。況復湘水無還。漳河空注。淚染枝葉。香餘紈素。風蕭蕭兮北渚。波烟漠漠兮西陵樹。夫不歸
兮江上石。子可見兮秦原墓。拍琴翻朔塞之音。挾瑟指邯鄲之路。望如何其望最傷。俟環玦兮思帝鄉。龍
門不見兮雲霧蒼蒼。喬木何許兮山高水長。春之氣兮說萬族。獨含嘯兮千里目。秋之景兮懸清光。偏結
憤兮九回腸。羨環拱於白榆。惜馳暉於落棠。諒衝斗兮誰見。伊戴盆兮何望。平豈止蘇武在胡。管甯浮海。
送飛鴻之滅沒。附陰火之光彩。鶴頸長引。烏頭未改。恨已極兮平原空。起何時兮東山在。永望如何。傷懷
孔多。降將有依風之感。宮人成憶月之歌。歌曰。張衡側身愁思久。王粲登樓日回首。不作涓濱垂釣臣。羞
爲洛陽拜塵友。

山陽城賦 井序

山陽故城遺趾數雉。四百之運終於此墟。裔孫作賦。蓋閔漢也。詞曰。

我止行車。竄涕於山陽之墟。是何蒼莽與慘悴。舂陵之氣兮焉如。踣昌運於四百。辭至尊而伍匹夫。有利
器而倒持兮。曾何芒刃之足舒。懿王迹之肇基。暨坤維之再敷。邈汜陽與鄗上。悅蛇變而龍據。痛人亡而
事替。終此地焉。忽諸嗟乎。積是爲治。積非成虐。文景之欲。處身以約。播其德芽。迄武乃穫。桓靈之欲。縱心
於昏。燕其妖焰。逮獻而焚。彼伊周不世兮。奸雄乘釁而騰振。物象摧以易位。被虛號而陽尊。終世殫而事
去。胡竊揖讓以爲文。嗚呼。維神器之至重兮。蓋如山之不羈。使人得譬乎逐鹿。固健步者所先。諒人事之

云爾。孰云當塗之兆也。自天亂曰。久矣莫可追。陞彼墟兮噫嘻。獨遺武兮貽後王之元龜。

秋聲賦 并序

相國中山公賦秋聲。以屬天官太常伯。唱和俱絕。然皆得時行道之餘興。猶有光陰之歎。況伊鬱老病者乎。吟之斐然。以寄孤憤。

碧天如水兮。窅窅悠悠。百蟲迎莫兮。萬葉吟秋。欲辭林而蕭颯。潛命侶以啁啾。送將歸兮臨水。非我十兮登樓。晚枝多露。蟬之思夕。蔓趣寒蟿之愁。至若松竹含韻。梧楸蚤脫。驚綺疏之曉吹。墮碧砌之涼月。念塞外之征行。顧閨中之騷屑。夜蛩鳴兮機杼促。朔雁叫兮音書絕。遠杵續兮何泠泠。虛窗靜兮空切切。如吟如嘯。非竹非絲。當自然之宮徵。動終歲之別離。廢井苔合。一作冷荒園露滋。草蒼蒼兮人寂寂。樹槭槭兮蟲啾啾。則有安石風流。巨源多可。平六符而佐主。施九流而自我。猶復感陰蟲之鳴軒。歎涼葉之初墮。異宋玉之悲傷。覺潘郎之么麼。嗟乎。驥伏櫪而已老。鷹在韝而有情。聆朔風而心動。眄天籟而神驚。力將殫兮足受紕。猶奮迅於秋聲。

劉賓客文集卷二

碑

唐興元節度使王公先廟碑

唐制五等有爵服而無山川登於三事得立四廟備物崇祀以交神明敬先報本以輔孝治有國之令典也維長慶三年前相國王公始卜廟於西京崇業里公時鎮劍南東川上章曰臣涯官秩印綬品俱第三請如式以奉宗廟制曰可是歲仲冬申命長男孟堅祔其主於三室明年公入爲御史大夫復以十二月躬行烝祭間歲公出梁州就拜司空禮崇異數廟加祀室太和二年增新室旣成祔顯考於尊位告饗由禮觀之者以爲世程第一室曰上儀同幽州別駕府君諱元政以妣博陵崔氏配第二室曰湖州安吉縣令贈尚書刑部員外郎府君諱實以妣贈扶風縣太君馬氏配第三室曰朝散大夫青州司馬贈戶部侍郎府君諱祚以妣贈武威郡太夫人賈氏配第四室曰温州刺史贈太尉府君諱冕以妣贈魯國太夫人博陵崔氏配初周靈王太子晉遇浮邱公化爲神仙時人號曰王家其後遂以命氏顯於秦者曰翦三世將秦師子孫分居晉代間東漢有徵君霸霸孫甲亦號徵君徙居祁縣爲著姓故至於今爲太原人自漢涉魏益以熾昌凡十葉至後魏度支尚書廣陽侯罔廣陽有二子神念神感神念南奔梁神感北仕齊惟儀同府君廣陽侯五代孫也唐興於太原實從義旗佐成王業故有開府儀同之寵惟刑部府君以功臣

子理二邑。不躋貴仕。故有錫羨後大之祥。惟戶部府君幼孤。以孝聞於鄉曲。未冠。以文售於有司。由前進士補延州臨安縣主簿。會詔徵賢良。策在甲科。授瀛州饒陽尉。歲滿遷渭南。天后在神都。而東畿差重。遂由渭南轉河陽。適逢建萬象神宮。旬內吏分董其役。因上書切諫。繇是名益聞。開元初。以大理司直。馳軺車聯讞大獄。閩禺朔漢。所至決平。蚤以樂棘傷生。晚成劇恙。樂就夷曠。故不至大官。惟太尉府君。生於治平時。以文學自奮。年十有五。賁然從秋賦。明年春。升名於司徒。又一年。玄宗御層樓。發德音。懸文詞政術科。以置髦士。府君策最高。授太常寺太祝。未幾。復以能通道德。南華。沖虛。三真經。進。整屋尉。天寶中。歷右拾遺。左補闕。禮部司駕。二外郎。屬幽陵亂華。遣兵南服。因佐閩粵。改檢校比部郎中。行軍司馬。時中原甫甯。江南爲吉地。二千石多用名德。乃以府君牧溫州。朝廷虛公卿。以俟高第。及聞訃。永嘉人輟春罷社。搢紳間以不淑相弔焉。雖位負於道。而邁德垂矩。後之人得以纘承丕揚之。其儲休啓祐。有自云爾。生三子。皆聰明絕人。長曰沼。以神童仕。至檢校禮部郎中。次曰潔。以奇文仕。至國子司業。今代郡公實季子也。蚤在文士藉。射策連中。咸世其家。貞元中。德宗聞其名。自藍田尉召入禁中。視草。厥後三典書命。再參內廷。憲宗器之。付以國柄。翊贊有道。雖冊免常居大僚。今年自梁州請覲。上思有舊臣爲羽儀。遂領太常。其公府如故。以一心事六君。顯官重務。靡不揚歷。且夫起諸生。至三公。而心愈卑。道益廣。出授黃鉞。以伯諸侯。入服華章。以謁家廟。追崇極大位。血食備多室。享全榮而奉昭薦。嗚呼。公侯之孝歟。宜書廟器。以視喬公之三鼎。其辭曰。

闕宇神庭。邃清而嚴。上公之儀。四室耽耽。犧以潔牲。粢以大糝。交神尚敬。合魄尚氣。子姪宗工。駿奔奉事。副筭侈袂。儼恪居次。孝孫兢兢。執爵而升。以裸以濯。以伏以興。水陸具來。擅薌畢登。列於圓方。其器增增。乃禴乃嘗。敬而追遠。二昭二穆。孝以尊本。瞻瞻兒幄。踳踳堂闔。禮成起慕。涕落玄袞。濡露踐霜。誰無永懷。不如達者。哀與榮偕。逢時奮庸。誰不得位。不如仁人。以道爲貴。惟公之達兮。名以顯親。惟公之仁兮。德以澡身。六朝之清臣。一代之全人。宜其世家翼翼。振振。罔不祇肅於廟之門。

東都留守令狐氏家廟碑

今上元年七月十三日。汴州刺史。宣武軍節度副大使。知節度事。汴宋亳等州觀察處置使。銀青光祿大夫。檢校禮部尚書。兼御史大夫。上柱國。彭陽縣開國伯。令狐公。西嚮拜章。上言。守臣楚蒙被恩澤。列爲元侯。得立家廟。以奉常祀。制書下其奏於有司。於是善相考祥。得地於京師通濟里。居無何。新廟成。公以守藩故。申命季弟監察御史。定卜牲練日。越八月丁亥。祔饗三室。培壟以尙幽。設幄以迎精。禮無尤違。神用甯謐。第一室曰。秦州上邽縣尉諱濬。以妣太原王氏配。第二室曰。絳州昌明縣令。贈吏部尚書諱崇亮。以妣贈太原郡夫人河東柳氏配。第三室曰。太原府功曹參軍。贈太子太保諱承簡。以妣贈魏國太夫人富春孫氏配。明年十月。公由浚郊。以介圭入覲。真拜戶部尚書。進爵爲魯侯。既辭戎旃。得以列侯謁三廟。是歲南至。上不視朝。又得以時展祭。先期致齋。栗然以敬。既齋盡志。歆然永思。奉其百順。陳以具物。始躋而虔恭。終獻而汎瀾。既卒事。顧麗牲之石。宜有刊紀。乃俾家老。授其牒於所知。云令狐晉邑也。晉大夫魏顥。

以輔氏之功始封焉。其易名曰文。國語所謂令狐文子是已。其先周文王之昭。畢公高之裔。畢萬爲晉卿。始封於魏。自萬至顥蓋四世。其後三十七世藍田侯虬。仕拓跋魏爲燉煌郡太守。子孫因家。遂占數爲郡人。藍田之孫熙。在隋爲納言。惟上邽府君。納言之玄孫。道克肖而位不至。惟尙書府君。西州之右族。光未耀而德已基。惟太保府君。志爲君子儒。以明經居上第。調補陽安縣主簿。歷正平尉。汾州司法參軍。陝州大都督府兵曹。終於太原府首掾。始以專經進。旣仕。旁通百家。愛穀梁子清而婉。左丘明國語辨而工。司馬遷史記文而不華。咸手筆朱墨。究其微旨。愷悌以肥家。信誼以急人。德充齒蓋。獨享天爵。故休祐集於身後。徽章流乎佳城。凡以子貴承澤。降命書告第者。始贈尙書祠部郎中。再贈禮部尙書。三加右僕射。四爲今稱。一作四進太保。五爲上公。先夫人亦四徙封。密印纍纍。邦族聳慕。生三子皆才。彭陽公爲嗣。次子從端。實肅給。今爲檢校膳部郎中。參河東軍事。季子前所謂監察御史。今主柱下方書。溫敏而有文。綽綽然真令兄弟。唯彭陽以詞筆取科名。累參侍從。由博士主尙書牋奏。典內外書命。遂登樞衡。言文章者以爲冠。擁節總戎。率身和衆。留惠於孟津。變風於浚都。言方略者以爲能。夫浚師嘆。暗難治。乘罽竊發。寢成習俗。莅止一作政。五載。飲和革心。束馬來朝。熊羆隕涕。問公遠期。觴必祝之。留爲常伯。旋命居守。汴人聞公之東。近而愈懷。翹翹瞿瞿。盡西其首。言遺愛者可紀焉。貴而率禮。老而能慕。忱惕乎霜露。齋莊乎廟祧。睦其仲季。施及鄉黨。言孝悌者歸厚焉。勒銘於碑。以代夷鼎。文曰。

己孤之孝。莫如備物。顯顯新廟。四阿三室。時惟仲月。卜用柔日。醴醖苾芬。牲怪博膾。籩飴在房。蕭管在庭。

孝孫烝烝。躬若奉盈。低簪委紳。薦俎登鏹。盼蟹交感。涕流緣纓。禮以備儀。誠以致美。祖考來格。錫之不祉。工祝告訖。退循軒屐。乃授風人。作詩以紀。猗歟彭陽之寵。光佐憲皇。穆穆皇皇。西省東臺。迭爲侍郎。國之大政。咨爾平章。敬宗凝旒。俾鎮雍邱。入爲地官。令守東周。彭陽之忠厚。宜介福以壽。東郊旣釐。可復朝右。縣縣其胄。系於周舊。由我顯起。必昌其後。太和紀元。作廟之首。刻碑廟門。龍集己酉。

高陵令劉君遺愛碑

縣內之大夫。鮮有遺愛在其去者。蓋邑居多豪。政出權道。非有卓然異績。結於人心。決於骨髓。安能久而愈思。大和四年。高陵人李士清等六十三人。思前令劉君之德。詣縣請金石刻之。縣令以狀申府。府以狀考於明法吏。吏上言。謹按寶應詔書。凡以政績將立碑者。其具所紀之文。上尙書考功。有司考其詞。宜有紀者。乃奏。明年八月庚午。詔曰。可。今書其章。明有以結人心者。揭於道周云。涇水東行。注白渠。醜而爲三。以沃關中。故秦人常得善歲。按水部式。決洩有時。畎澮有度。居上游者。不得擁泉而專其腴。每歲少尹一人。行視之。以誅不式。兵興已還。寢失根本。涇陽人果擁而專之。公取全流浸原爲畦。私開四瀆。澤不及下。涇田獨肥。它邑爲枯。地力旣移。地征如初。人或赴訴。泣迎尹焉。一作馬而占涇之腴。皆權倖家。榮勢足以破理。訴者覆得罪。絲是咋舌。不敢言。吞冤銜忍。家視孫子。長慶三年。高陵令劉君勵。精吏治。視人之瘼。如瘵。疽在身。不忘決去。乃循故事。考式文。暨前後詔條。又以新意。請更水道。入於我里。請杜私竇。使無棄流。請遊田令。使無越制。別白纖悉。列上便宜。掾吏依違不決。居二歲。距寶歷元年。端士鄭覃爲京兆。秋九月。始

具以聞。事下丞相御史。御史屬元谷實司察視。持招書詣白渠上。盡得利病。還奏青規中。上以谷奉使有狀。乃俾太常撰日。京兆下其符。司錄姚康。士曹掾李紹實成之。縣主簿談孺直實董之。冬十月。百衆雲奔。憤與喜并。口謠手運。不屑鼙鼓。揆功什七八。而涇陽人以奇計賂術士。上言曰。一無白渠下。高祖故墅在焉。子孫當恭敬。不宜以畚鍤近阡陌。上聞。命京兆立止絕。君馳詣府控告。具發其以賂致前事。又謁丞相。請以頽血汚車茵。丞相彭原公斂容謝曰。明府眞愛人。陛下視元元無所恠。第未周知情僞耳。卽入言上。前壘日。果有詔許訖役。仲冬。新渠成。涉季冬二日。新堰成。駛流渾渾。如脈宣氣。蒿荒漏胃。一作迎耜澤澤。釋音開塞分寸。皆如詔條。有秋之期。投鍤前定。孺直告已事。君率其寮躬勞徠之。丞徒讙呼。奮襖襜而舞。咸曰。吞恨六十年。明府雪之。藹姦犯豪。卒就施爲。嗚呼。成功之難也。如是。請名渠曰劉公。而名堰曰彭城。按服。一作引而東。千七百步。其廣四尋。而深半之。兩涯夾植杞柳萬本。下垂根以作固。上生材以備用。仍歲旱沴。而渠下田獨有秋。渠成之明年。涇陽三原二邑中。又擁其衝。爲七堰。以折水勢。使下流不厚。君詣京兆。索言之。府命從事蘇特至水濱。盡撤不當擁者。繇是邑人享其長利。生子以劉名之。君諱仁師。字行輿。彭城人。武德名臣。刑部尙書。德威之五代孫。大歷中。詩人商之猶子。時好文學。亦以籌畫干東諸侯。遂參幕府。歷尹劇縣。皆以能事見陟。率不時而遷。既有績於高陵。轉昭應令。俄兼檢校水曹外郎。充渠堰副使。且錫朱衣銀章。計相愛其能。表爲檢校屯田郎中。兼侍御史。幹池鹽於蒲。錫紫衣金章。歲餘。以課就加司勳正郎中。執法理人爲循吏。理財爲能臣。一出於清白故也。先是高陵人蒙被惠風。而惜其捨去。發於胸

懷播爲聲詩。今采其旨而變其詞。志於石。文曰。

噫。涇水之透迤。溉我公兮。及我私。水無心兮。人多僻。錮上游兮。乾我澤。時逢理兮。官得材。墨綬茲兮。劉君來。能愛人兮。恤其隱。心旣公兮。言旣盡。縣申府兮。府聞天。積憤刷兮。沈痾痊。劃新渠兮。百畎。流行龍蛇兮。止膏油。遵水式兮。復田制。無荒區兮。有良歲。嗟劉君兮。去翱翔。遺我福兮。牽我腸。紀成功兮。鑄美石。求信詞兮。昭懿績。

唐故朝議郎守尚書吏部侍郎上柱國賜紫金魚袋贈司空奚公神道碑

嗚呼。有唐清臣尚書吏部侍郎奚公。貞元十五年十月甲子。薨於位。詔贈禮部尚書。太常考行。諡曰某。是歲臘月丁酉。葬於萬年縣之某原。後三十有四年。子爲諸侯。爲大夫。門戶有煒。於是門下生。琢石紀德。揭於新阡云。公諱陟。字般衡。其先在夏爲車正。以功封於薛。下古以降。爲譙郡人。或因仕適楚。復之秦。今爲京兆人。隋唐之際。再世以明經爲博士。家有賜書。曾祖簡。亦以文學爲太子司議郎。大父乾。繹仕至光州刺史。烈考諱某。有道而尚晦。終徐州司功參軍。贈和州刺史。由子貴也。天以大運生萬物。而以正氣錄賢人。至和來宅。其德乃具。公實有焉。幼而擢陵茗之秀。長而成清廟之器。羣倫月旦。咸以第一流處之。及從鄉賦。暨升名太常。果居上第。明年。詔郡國徵賢良。設四科以盡材。公居文詞清麗之目。授弘文館校書郎。時德宗新卽位。弊怛一作怛。虜庭西戎畏威。底貢內附。詔諫議大夫崔河圖持節卽虜帳以報之。使臣欲盛其賓寮。以自大。遂嘿表公爲介。授大理評事。除書到門。公方爲人子。不敢許。以遠稱。病弗果行。歸甯壽春。

養志盡敬。丞相楊炎勇於用才。擢公爲左拾遺。奉安輿而西。未幾。再集茶蓼。居後喪將闋。是歲建中四年。京師急變。黃屋顛動。狩於巴梁。公徒行間道。以歸王所。既中月。而詔授起居郎。充翰林學士。創鉅愈遲。病不拜職。改太子司議郎。從大駕。回入尙書爲司金元士。且參樞筦之務。有頃。持愍册宣恩於薊門。將行。錫銀朱於青蒲上。復命稱旨。轉吏部員外郎。是曹在南宮爲眉目。在選士爲司命。公執直筆。閱簿書。紛拏盤錯。一瞬而剖。時文昌缺。左右丞都曹差重。遂轉左司郎中。尋遷中書舍人。執事者繫公識精。以斟酌大政。非獨用文飾也。會江淮間民被水禍。上愍焉。特命公宣撫之。許以便宜及物。赤車所至。如東風變枯。條其利病。復奏成。可轉刑部侍郎。時主計臣延齡。以險刻貴倖。而與京兆尹相惡。以危事中之。尹坐譴已。又逮繫其吏峻繩之事。下司寇。主奏議者。欲文致而甘心焉。公侃然持平。挫彼嶽嶽。君子聞之。善其知道不私。刑曹旣清。以餘刃兼領選事。居一年。授權知吏部侍郎。又一年。卽眞。是秩言能審官者。本朝有裴馬盧李四君子。物論以公媿焉。時得疾發癰。有國醫方直禁中。上促遣如第。且敕之曰。某賢臣也。悉術以治之。及有司以不起聞。上震悼加等。公娶琅邪王氏。石泉公之曾孫。友壻皆一時彥士。長子某。蚤不祿。第二子敬則。歷太僕少卿。今爲濮州刺史。兼御史中丞。賜金紫。以連最就加貴秩。俾視九卿。第三子敬玄。以詞藝似續。登文科。歷左補闕。今爲尙書刑部郎中。第四子昺。舉進士。最小子某。咸砥礪纂修。宜爲名公家子。其邁德垂裕之光乎。公少以名器自任。及顯達。急於推賢。視其所舉。則在西省。薦權丞相。由右史掌訓詞。在中銓。表揚僕射。由地曹郎綜吏部。二公後爲天下偉人。凡執文章權衡。以揣量多士。一入中禁。考策詞三。在

天官第章句披沙剖璞由□而顯者落落然居多推是風鑒移於大治則鎔範之內無非祥金嗟乎天不遐其福而孤民望使由庚之什不作於貞元中惜也初公既齋終詔贈大宗伯後以第二子在郎位被霈澤再追襲至司空故昔之葬儀用常伯而今之碑制用三公云銘曰

仁麟智龍爲瑞一辰未若君子瑞於人倫惟唐德宗道類漢宣責實繩下風稜言言公丁斯時籍在雋賢從難表節執羈而還帝曰汝器黃流瑟然可爲大僚左右化源乃飾王度乃馳輶軒既執利柄亦操吏權陽和熙熙貯在顏間守法持正嶷如秋山火不侵玉倖臣畏服鳳鳴祥烟梟噪低跽帝方倚用天不假年公寐無寤有名愈遠門人達者赤舄玄袞公居甚卑其德愈尊兩子朝服駢驅朱輪佳城何在冑貴之里螭首龜趺德輝是紀嗚呼後人下拜於此

劉賓客文集卷二

碑

唐故福建等州都團練觀察處置使福州刺史兼御史中丞贈左散騎常侍薛公神道碑

薛在三代爲侯國。介於鄒魯間。傳世三十有一。爲齊所并。其公子奔楚。錫土田於沛。漢末避仇之成都。曹魏平蜀。徙家汾陰。遂爲河東臨晉人。自奚仲爲夏車服大夫。距今數千年。乘軒服冕。烏炎冠。世言氏族者。署爲關內甲姓。天意若曰。始有功於車服。錫爾子孫。世世有之。公諱審。字某。曾祖寶胤。以名家子。且有學行。歷尙書郎。雍州司馬。邠州刺史。王父繪。有雋材。刺三郡金。密縣。皆以治聞。累績至銀青光祿大夫。封龍門侯。烈考承矩。以文亡害。仕至大理丞。公幼承前人之覆露。補崇文生。歲滿得調。主簿書於毫之譙。苦二邑。又尉於東畿之河清。貞元中。上方與丞相調兵食。思得通吏治而習邊事者。計相以公爲對。乃授監察御史裏行。充京兆水運使局。居雁門主穀糴。具舟楫。募勇壯。且便弓矢者爲榜夫。千有餘人。隸尺籍伍符。制如舟師。詔以中貴人護之。聲震塞上。每發粟。沂河北行。涉戎落。以饋緣邊諸軍。及乘障者。雖河塞回遠。必克期如合符。一歲中省費萬計。累加侍御史。內供奉。賜緋魚袋。有司條白其勞。入拜殿內史。未幾。淮海節將以戎倖缺聞。事下丞相御史擇可者。僉曰。公政事已試。遂授檢校戶部外郎兼御史淮南軍司馬。尋轉駕部郎中。錫以金紫。遇府遷。申命真相趙國公帶中書侍郎代之。公主行臺留務。趙公文茵及境。視置

郵供帳及郊視將迎部伍下車視簾幃器備乃曰信奇才也此不足以展驥朝廷知之擢爲泗濱守既報政就加御史中丞俄遷福建都團練觀察使閩有負海之饒其民悍而俗鬼居洞岩音家桴筏者與華言不通公兼戎索以治之五州民咸說元和十年某月某日薨於位年六十七贈左散騎常侍夫人趙郡李氏無兒蚤世繼夫人隴西李氏檢校禮部尚書河東節度使說之女生子凝爲嗣季子茂弘以諸侯禮儀返葬故里蛾眉原從周也後二十有三年元曰開成凝爲平盧從事謹按令甲礮碑石來乞詞以垂於悠久初公治粟於朔陲愚方冠惠文冠察行馬外事聆風相厚謂可妻也以元女歸之明年愚入尙書爲郎職隸計司因白計相召公來會府行有日矣遇內禪惟新愚以緣坐左貶間關外役竟不克面然而公之德善灌注心耳孝悌爲根柢誠明枝葉之直方爲天質禮讓緣飾之所至藹然繇此道也公初下世故人丞相李太師誌其墓其略曰弘深莊重幹敏絕人此與遊者傳信之詞也豈誣也哉故作銘曰

河汾齋淪鼎氣歟雲散爲昌光凝爲賢人常侍之生其宗孔碩從祖昆弟誅誅三百文館入仕幽龍未光尺木爲階欵然欲翔司會知材績宣朔方邊師萬喉俟我羸糧泝於黃河路出戎疆募乃勇士卓衣挽航膺索臂弧穹廬在旁虜聞公名憚不敢攘安北以南列城相望率有儲待皆成金湯入居殿中分巡輦下淮海軍大往爲司馬軍中之治可移諸民乃牧於泗乃廉於閩閩悍而囂夷風脛急恩信綏之安然如塾閩方不淑天奪其福公薨於寢玄頽以復天王廢朝贈之金貂莓莓晉原鬱矣中條大墓舊阡松楸蕭蕭笳鼓以歸德音孔昭

許州文宣王新廟碑

歲在丙辰。元曰開成。許州牧尙書杜公。作文宣王廟。暨學舍於兌隅。革故而鼎新也。前年公受社與鉞。且董淮揚汝南之師。八月上丁。釋菜於宣父之室。陋宇荒階。不足回旋。已事而歎。乃詢黃髮。有鄉先生前致辭曰。自盜起幽陵。許爲兵衝。運戰交梓。卒無甯歲。耳說鉦鼓。不職弦歌。目不知書。不害爲智。爾來生聚教養。起居祖習。壹出於軍容。今幸天子憐許民。爲擇賢侯。此人人思治之時也。公曰諾。吾當先後之。於是元年修戎律。以通衆志。次年成郡政。以蠲民瘼。季年崇教本。以厚民風。我言旣從。乃卜新宮。灑水之灑。城池在東。登登其杵。坎坎其斧。繩之墨之。鑿柄枝梧。載墜載塗。一作載。一作載。與默。一作焉陵虛。寢廟弘敞。齋宮嚴闕。軒墀廡廡。儼雅清潔。門庭牆仞。望之生敬。外飾觚稜。中設黼幄。嚮明當宇。用王禮也。堯頭禹身。華冠象佩。之容。取之自鄒魯。及門覩奧。偶形畫像之儀。取之自太學。尊彝籩豆。青黃規矩之器。秉周禮也。犧牲制幣。薦獻陸降之節。遵國章也。藏經於重檐。斂器於庑櫺。講筵有位。鼓篋有室。授經有博士。督課有助。教指蹤有役。夫灑埽有廟幹。公又割隙地爲廣圃。萌其柔蔬。而常菹旨蓄之禦備。捨己俸爲子錢。推其孳贏。而鹽酪釭膏之用。給濟濟莘莘。化行風驅。家慕恭儉。戶知敬讓。父誨其子。兄規其弟。不遊學堂。與撻市同。繇是靡勇爵戴鶡冠者。往往弭雄姿而觀習禮。矜甲冑者。知根於忠信。服縵胡者。不敢侮逢掖。教化之移人也。如置郵焉。冬十一月。許人以新儒宮成來告。且乞詞欲行乎遠也。公名儉。字永裕。故丞相歧國公之孫。歧公弼。諧三帝。碩學冠天下。嘗著書二百餘篇。言禮樂刑政。古今損益。統名曰通典。藏在石室。副行人間。今孝

孫聿修之。刑乎事業。播於聲詩。懿哉。能世其家也。禹錫昔年。忝歧公門下生。四參公府。近年牧汝洲。道許昌。躬閱其政。故不得讓。遂銘於麗牲之碑。銘曰。

許分韓魏。四征之地。兵興已遠。其闢曠曠。亦有儒宮。軋於兵間。賢侯戾止。思樂泮水。俾人向學。王化之始。便地爰相。新規鬱起。廟貌斯嚴。堂皇有煒。秩秩禮物。祁祁胄子。入於門牆。如造闕里。春誦夏弦。載颺淑聲。風於閭閻。浹於郊垌。途讓班白。家尊父兄。與化而遷。其猶性成。昔之委巷。相詬交侮。今逢親戚。不道嫖語。昔之連營。誇力使酒。今遇賓客。斂容拱手。魯有泮林。鳥革其音。許崇學黜。民說其教。鑄於圭石。以志新廟。

唐故朝散大夫檢校尚書吏部郎中兼御史中丞賜紫金魚袋清河縣開國男贈太師崔公神道碑
太師諱倕。字某。清河東武城人。太公望既封於營邱。子伋嗣侯。伋之孫曰穆伯。食邑於崔。遂以爲氏。後十四世。至秦末東萊侯意如。東萊之子伯基。始居清河。又十五葉生瑋。爲魏名臣。又九葉生休。仕後魏爲七兵尚書。七兵之弟曰寅。爲樂安太守。公卽樂安八代孫。始以門子補鄭州參軍。力行好學。於子道以孝聞。處伯仲間。以友聞。讀易至編絕。以精易聞。至德中。戎羯猾夏。王師出征。公少有奇志。思因時以自奮。乃作伐鯨鯢賦上獻。旣聞爾矣。果器之會。第五丞相以善言利得幸。盡付利權。始有鹽鐵使之目。慎選寮屬。表公爲介。轉臨晉縣丞。處繁應卒。鎗刃不頓。府能再遷。至太子司議郎。韓晉公時爲戶部侍郎。掌邦賦。急於用材。薦公爲監察御史。主河東租庸之務。尋轉侍御史。充京東平^{一作}和。繹使建中初。德宗始親萬機。儲精治本。有漢宣與我共理之歎。謂大臣求可當良二千石者。遂以公帶本官權知袁州刺史。期月有成。詔書

顯揚。就加真秩。益以金紫。居無何。韓晉公爲丞相。制國用。思公前績。乃傳召之。抵京師。授檢校戶部郎中。兼侍御史。幹池鹽於蒲。修牢盆。謹衡石。煎和旣精。飴散乃盈。商通而荐至。吏懼而循法。民不絀網。而國用益饒。歲杪會其所入。贏羨什百。詔下褒其能。轉吏部正郎。兼御史中丞。且加五等之爵。方倚以重任。天富其材。而不遐其福。享齡六十有五。貞元七年某月某日。遘疾。終於治所。上聞悼之。因降愍冊。贈鄭州刺史。賚錢五百萬。以備飾終之禮。明年某月某日。返葬於成周之偃師。從世墓也。累贈至太師。夫人隴西李氏。汾州司倉參軍咸一之女。生才子六人。長曰邠。及公時已爲左拾遺。後至太常。次曰艷。至太府卿。次曰鄜。至外臺尚書。次曰郇。今爲廷尉。次曰鄴。至執金吾。季曰鄆。今爲太常卿。同中書門下平章事。惟夫人姑臧冠族。以蘋蘩組紉輔佐君子。爲令妻積三十餘年。以慈儉忠厚訓誡諸子。爲賢母二十有三年。當永貞初。順宗踐阼。澤流自葉。長子邠時爲詞臣草冊書。以文當進階。遂上疏乞移榮於親。優詔允之。特封清河郡太君。士林聳慕。皆自痛其不及。邠爲太常。艷爲大農。咸白髮貴綬。以奉膳羞。諸季各以簪裾給事。左右愉愉然先意無違。言世榮者。舉無與比。以子貴。累封贈至涼國太夫人。元和八年三月十六日。捐館舍。壽七十有九。是歲十月某日。合祔。惟太常及尚書暨今相國。皆自中書舍人爲禮部侍郎。凡五貢賢能書。得士百四十有八人。言兄弟者。許爲人瑞。崔氏之門。六人皆入文昌宮。其間三人歷八侍郎。純而論之。三大卿。兩連率。二翰林學士。一執金吾。言冠冕者。許爲世雄。與姑臧李范。陽盧世爲婚媾。入於姻黨。無第二流言門閥者。許爲時表。太常二子。亦以才能同入尚書。璜爲吏部郎。瓘爲司勳郎。其它支孫未登金閨籍者。詵

旣然魚貫而進。文業甚似。而孝謹不衰。猗歟君子之澤。其所從來遠。而有光於開成。己未歲七月甲辰。相君受詔於明庭。始操國柄。仲月奉嘗事於家。禮成起慕。悄然永懷。曰古者卿大夫廟有鼎。墓有碑。皆銘之以紀先德也。今備位宰相。敢不敬前人之耿光。乃俾家老。條白事功。咨於學古者。徵其詞。尙信也。又命宗祝卜柔日。告於廟。盡誠也。儀甚備而敬有餘。斯所謂達禮之君子。遂刊勒如式。揭於道周。銘曰。

奕奕四姓。崔爲之冠。瞻其門牆。倬若雲漢。善積家肥。子孫多材。如彼棗棟。必生徂徠。太公之後。彌二千祀。炯如貫珠。焯見圖史。顯允太師。丕承德基。構於其堂。亦旣暨茨。生逢艱虞。戎夏交師。獻賦伐叛。忠存乎詞。兵興事叢。飛輓四馳。歷踐劇職。視屯如夷。乃主平糴。乃分竹使。治粟爲邦。其道一致。蒲實近地。鹽爲利泓。使車來思。刻弊立程。吏廉商通。歲倍其贏。奏課連最。德音襲明。就加執法。好爵兼榮。天賦之才。不與壽并。生樹德本。沒揚淑聲。上聞軫懷。侑樂爲停。贈禭之禮。侔於公卿。萬石貽訓。根於孝友。太邱種德。乃稔身後。家有令子。妻爲壽母。三十餘年。人倫之首。六子來侍。如龍如虎。衆婦來饋。維筐及筥。佩玉鳴環。交響庭戶。申申秩秩。歡不踰矩。昔爲甲族。今爲興門。天爵人爵。蔚然兩尊。先德蔭之。默如重雲。孕和合粹。濯潤本根。景毫之原。圖書之川。陽陵帝壇。旁礪回環。世安其神。世嗣其賢。聆德風者。拜於碑前。

唐故宣歙池等州都團練觀察處置使宣州刺史兼御史中丞贈左散騎常侍王公神道碑

常侍諱質。字華卿。始得姓自周靈王太子晉賓天而僊。時人曰王子。因去姬爲王氏。自秦漢以還。世多顯名。由今而上。十有一代名傑。仕元魏爲并州刺史。子孫因家。遂爲太原祁人。并州六代孫名通。字仲淹。在

隋朝諸儒唯通能明王道。隱居白牛谿。游其門。皆天下儁傑。著書行於世。既沒。諡曰文中子。文中生福祚。爲蔡州上蔡主簿。上蔡生勉。舉進士。徵賢良。皆上第。仕至河中府寶鼎令。寶鼎卽公之曾祖也。祖諱怡。渝州司戶參軍。考諱潛。揚州天長縣丞。贈尙書吏部郎中。公其季子也。始文中先生有重名於隋末。其弟績亦以有道顯於國初。自號東臯子。文章高逸。傳乎人間。議者謂兄以大中立言。弟游方外。遂性。二一作百年間。君子稱之。雖四夷亦聞其名字。公雅有遠志。常自忖度。我大名之後。不宜無見焉。遂力學。厚自淬琢。於春秋得其公是。於禮得其約。僑居淝水上。躬督穡事。善積於己。而淮楚間羣彥多與之游。公歉然自少。無進取意。與游者激之曰。卿文儒家子。篤志如是。盍求發聞。去聲俾家聲不頽。今夫以文學茫洋當世者。誰如華卿。庸自棄耶。入謀於閨門。咸以外言爲是。因決策而西。在貢士籍。天和內充。不以時尙屑意。角逐攻取。初無此心。如榿楠生於深林。未始自貴。而度材者一眇歆然。在懷。故以不爭而速售。既登第。東諸侯交辟之。從主者書記於嶺南。授正字。參謀於淮右。進協律郎。其後佐許下。暨梓潼。南梁。率爲上介。官至兼監察御史。司憲聞其賢。徵入南臺。轉殿內歷侍御史。改尙書戶部外郎。復爲知己所薦。遷檢校司封郎中。攝御史中丞。紫衣金章。充山南西道節度副使。入爲尙書戶部郎中。以方雅特立。除諫議大夫。會宋丞相坐狷直爲飛語所陷。抱不測之罪。大僚進言無益。公率諫官數輩。日晏伏閣。上爲不時開便殿。公於旅進中。獨感激雪涕居多。由是上怒稍解。得從輕吐。公終以言責爲憂。求爲虢州刺史。宰相惜去。又重違誠請。增之以兼御史中丞。用示異於人也。大凡以智謀而進者。有時而衰。以朴厚而知者。無迹而固。公雅爲今揚。

州牧贊皇公所知。人不見其迹。方在號略。贊皇入相。擢爲左曹給事中。凡有大官缺。必寵薦。居數月。遷河南尹。又未幾。鎮宛陵。是三者中外所注意。不旬歲而周歷之。時論不以爲黨。河南帝之別京。其治尙體度。風采而別白。區處之。宣城國之奧壤。其治在東。東惠下。蘇罷羸。響剽輕。而勞徠澄汰之。公兩得其道。不由一揆。率身以儉。而素風存。任人以誠。而羣務舉。遇中貴人以禮。而故態革。內潔其志。下盡其忠。外無以撓於理。三者具。求政之有裨。曷由哉。在鎮三載。開成元年十二月八日薨於位。享年六十三。監軍使上言。有詔軫悼。不視朝。贈左散騎常侍。明年八月十一日。葬於河南府永甯縣洛川鄉史原。從舊阡也。初公娶於滎陽鄭氏。生三女。而沒。今蓋祔焉。一子曰慶存。方亂矣。猶子前太原府參軍扶。執宗長書來請曰。扶也。蚤孤。荷世父常侍之覆露。今其嗣幼。未任充家。姑封琴書司管鑰。以俟其長。竊懼世父之德音不敷。思有以垂於後者。以誠告於從叔大司農。復命曰。俞。謹襲貞石。以乞詞。無忽。余昔爲郎。與常侍同列。已熟其行實。及讀墓誌。卽今丞相益州牧趙郡李公之文。自稱爲忘形友。其在宣州。李公再人相。議以第一官處之。牢讓不取。羔鴈所禮。則河東裴夷直。天水趙哲。隴西李行方。吳郡陸紹。梁國劉蕢。博陵崔珣。人咸曰。得士夫揚州少與也。而見器益州寡合也。而見親。六從事材不一也。而畢樂用。是足以觀德。庸可勿紀焉。銘曰。隋有文中。紹敷微言。當時偉人。咸出其門。粹氣紆餘。鍾於後昆。常侍恂恂。文中來孫。發源高麓。中泳後大。蘭芽茁然。秀出叢蒼。善不近名。其聲日彰。行勇於退。其道愈光。哲者知之。寘如周行。以正持憲。以文爲郎。以和佐戎。以惠臨邦。以直司諫。以公駁政。守於三川。頑民底定。乃鎮於宣。先馳淑聲。邑中婆娑。瞻我旆旌。

問誰詢謀。濟濟君子。問誰出內。潔潔廉士。道本乎心。暢於四支。治本乎正。形於百爲。黠吏斂手。齊民揚眉。江淮藪空。夜析弗施。公臥於齋。邦民悽悽。公衣升屋。邦民行哭。牙璋斯來。柳絮言旋。棠樹未老。周人慕焉。熊耳之陽。泱泱洛川。佳城在茲。旣固且安。松楸瑟然。石馬矯然。過者必敬。宛陵之阡。

唐故邠甯慶等州節度觀察處置使朝散大夫檢校戶部尚書兼御史大夫賜紫金魚袋贈右僕射
史公神道碑

僕射名孝章。字得仁。本北方之強。世維朔野。其後因仕中國。遂爲靈武建康人。曾祖道德。贈右散騎常侍。封懷澤郡王。祖周洛。銀青光祿大夫。檢校太常卿。兼御史中丞。北海郡王。贈太子太保。考憲成。蚤以武勇。絕人積功。至魏博節度使。終於河中。晉絳慈隰等州節度觀察使。檢校司徒。兼侍中。河中尹。贈太保。其薨也。大臣中書令晉國公裴氏爲之碑。其名益顯。公卽侍中之元子。母曰冀國夫人李氏。幼而聰寤。父母賢而加愛焉。及長。好學。遷善。秀出儕輩。鄴下諸兒。號爲書生。元和中。太尉愬爲魏帥。下令掄材於轅門。取大將家翹秀者爲子弟軍。列於諸校之上。公獨昌言願效文職。太尉深奇之。遂假魏州大都督府參軍。長慶二年。常山衆叛。害其帥沂國公田司徒於帳下。沂公發跡於魏。人猶懷之。詔命其子布以尚書授鉞。統魏兵。問罪於北一作此疆。且報家禍。布旣啓行。士氣不振。渙然內潰。獨與宄從之旅。假旗而歸。百憤攻中。卒自引決。先侍中時爲中軍都知兵馬使。兼御史中丞。全師在野。闕然推戴之。請爲假侯。以鎮定。中貴人飛驛上聞。穆宗夜召翰林學士草詔書。以眞侯命之。實有魏土。從衆而合權也。是歲。公自攝官。轉本府士曹參

軍兼監察御史。賜朱衣銀印。推恩以及子也。一旦跪於父母前進苦言曰。臣竊惟大河之北。地雄兵精。而天下賢士心侮之。目曰河朔間。視猶夷狄何也。蓋有土者多乘兵機際會。非以義取。今臣家父侯母封。化爲貴門。君恩至矣。非痛折節礪行。彰信於朝廷。無以弭讖者之譏。寤明君之意。節著於外。福延於家。乘時蹈機。禍不旋踵。言訖泣下數行。父俞母贊。天性交感。三心旣叶。萬衆潛化。天子聞而嘉之。曰。彼真有子。乃授檢校太子左諭德。兼侍御史。充節度副使。累遷至散騎常侍。兼御史大夫。賜金印紫綬。旣貳軍政。事如命卿。弛張損益。得以參決。潛革故態。人知嚮方。大和二年。滄景節度使李全略卒。其子同捷竊據。故地詔下。以文告弗革。遂用大刑。先侍中表請率先諸侯。使元子以督戰。制曰可。公承君父之命。乃捐其軀。一舉而下平原。壓滄壘。由是加工部尙書。及王師凱旋。上表願一識承明廬。詔允之。遂赴北闕。下得覲於使殿。上曰。嚮吾始征滄州。議者皆曰。彼魏之姻也。慮陰爲寇謀。我發使數輩以偵之。其還也。僉曰。爾父瀝款於賓筵。爾母抗詞於簾下。願絕姻以立效。其經始啓發。出於爾心。今滄海底平。策勳之日。宜貴爾三族。命爾父爲侍中。遷鎮於近地。加爾禮部尙書。析相衛澶三州爲鎮。以居之。俾爾一門大榮。以誇天下。公拜稽首謝。父遷讓已。爵禮無違者。翌日。詔下於明庭。人咸曰。史氏之寵光。古無有也。牙旗碧幢。方指東道。侍中以帳下生變聞。秦極而否。當歌而哭。迎柩於路。仰天長號。因葬於洛陽之印山。冀國夫人耐焉。寢苦枕塊。以所仇同天爲大酷。未幾。詔舉金革之義。起爲右金吾將軍。累表陳乞。有司以違命督之。輿疾卽路。間歲擢授鄜坊丹延等州節度觀察處置等使。居四年。遷鎮於滑。一歲入爲右領軍衛大將軍。旋改右金吾大將。

軍。又授鉞於邪。孟秋至治所。首冬遘疾。拜章入覲。不克展和鸞。備革之儀。薨於靖恭里之私第。享齡三十九。當開成三年十月二十日。上聞而悼之。不視朝一日。贈尙書右僕射。明年二月。歸葬於洛都。夫人琅邪王氏。祔焉。繼室深澤縣君博陵崔氏。有一子曰煥。生七年而孤。僕射之喪。自復魄至葬。當門戶。備祭祀。建碑表。皆縣君之能。且命其家老具事功來請曰。嫠不恤家。而憂幼嗣。不知其先人之官業。乞詞以傳於後也。君子以爲知禮。謹書之。銘曰。

斗極之下。崆峒播氣。鍾於侍中。孔武且貴。奉上致命。宜昌後嗣。僕射承之。良弓不墜。耳煩鉦鼓。心說文字。虎穴之中。生此騏驥。大和紀元。滄景不度。子弄父兵。跳浪海壖。有鄰陰交。蝟起雞連。詔下薄伐。良隅騷然。時惟侍中。實統魏師。蓄銳未發。衆心危疑。僕射爲子。陳謀盡詞。興言涕零。有感尊慈。絕姻效節。精貫神祇。滄波底甯。王師褒之。乃遷元侯。來鎮近畿。乃胙元子。別建旌麾。一門四節。焜燿當時。倏忽變生。魏郊紛披。喬木雖大。盲風不知。干雲之臺。列缺焚之。哀哀孝嗣。於此大酷。迎護幃輦。葬於東洛。訴天觸地。血染綬服。禮有金革。詔書敦促。不遂枕戈。驟膺推轂。雕陰白馬。暨於邪谷。雖榮三鎮。不荷百祿。綺紈之間。珪組累累。如彼晨葩。日中而萎。有妻名家。有子樛齒。行號執禮。歸窆蒿里。洛水之陽。循邛之趾。昭尊穆敬。幽顯同理。舊松新柏。亦象橋梓。刻石紀功。垂於萬祀。

劉賓客文集卷四

碑 釋門銘記附

大唐曹溪第六祖大鑿禪師第二碑

元和十一年某月日。詔書追褒曹溪第六祖能公。諡曰大鑿。實廣州牧馬。物以疏聞。繇是可其奏。尙道以尊名。同歸善善。不隔異教。一字之褒。華夷孔懷。得其所故也。馬公敬其事。且謹始以垂後。遂咨於文雄。今柳州刺史河東柳君爲前碑。後三年。有僧道琳率其徒由曹溪來。且曰。願立第二碑。學者志也。維如來滅後中五百歲。而摩騰竺法蘭以經來華。人始聞其言。猶夫重昏之見。忽爽。後五百歲。而達摩以法來華。人始傳其心。猶夫昧旦之覩白日。自達摩六傳至大鑿。如貫意珠。有先後而無同異。世之言真宗者。所謂頓門。初達摩與佛衣俱來。得道傳付。以爲真印。至大鑿置而不傳。豈以是爲筌蹄邪。芻狗邪。將人人之莫己若。而不若置之邪。我不得而知也。按大鑿生新州。三十出家。四十七年而沒。百有六年而諡。始自蘄之東山。從第五師得授記。以歸。高宗使中貴人再徵。不奉詔。第以言爲貢。上敬行之。銘曰。至人之生。無有種類。同人者形。出人者智。蠢蠢南裔。降生傑異。父乾母坤。獨肖元氣。一言頓悟。不踐初地。五師相承。授以寶器。晏坐曹溪。世號南宗。學徒爰來。如水之東。飲以妙藥。差一作其瘡。豐詔不能致。許爲法雄。去佛日遠。羣言積僣。著空執有。各走其域。我立真筌。揭起南國。無修而修。無得而得。能使學者。還其

天識如黑而迷。仰見斗極。得之自然。竟不可傳。口傳手付。則礙於有。留衣空堂。得者天授。

佛衣銘并引

吾既爲僧。琳撰曹溪第二碑。且思所以辯六祖置衣不傳之旨。作佛衣銘曰。

佛言不行。佛衣乃爭。忽近貴遠。古今常情。尼父之生。土無一里。夢奠之後。履存千祀。惟昔有梁。如象之狂。達摩救世。來爲醫王。以言不痊。因物乃遷。如執符節。行乎復關。民不知官。望車而畏。俗不知佛。得衣爲貴。壞色之衣。道不在茲。由之信道。所以爲寶。六祖未彰。其出也微。既還狼荒。憬俗蚩蚩。不有信器。衆生曷歸。是開便門。非止傳衣。初必有終。傳豈無已。物必歸盡。衣胡久恃。先終知終。用乃不窮。我道無朽。衣於何有。其用已陳。孰非芻狗。

唐故衡嶽大師湘潭唐興寺儼公碑

佛法在九州間。隨其方而化。中夏之人。汨於榮。利一有破榮莫若妙覺。故言禪寂者宗嵩山。北方之人。銳以武。力一有攝武莫若示現。故言神通者宗清涼山。南方之人。剽而輕。制輕莫若威儀。故言律藏者宗衡山。是三名山。爲莊嚴國。必有達者。與山比崇。南嶽律門。以津公爲上首。津之後雲峯。證公承之。證之後湘潭儼公承之。星月麗天。珠璣同貫。由其門者。爲正法。馬公號知儼。曹氏子。世爲郴之右姓。兆形在孕。母不嗜葷。成童在侶。獨不嗜戲。其夙植因厚者歟。生九年。樂爲僧。父不能奪其志。抱經筍入岫。嶼山。從名師執業。凡進品受具。聞經傳。卽皆當時大長老。我入明門。不住諸乘。我行覺路。徑入智地。居室方丈。名聞大千。護法

大臣多所賓禮。嗣曹王臯之鎮湖南，請爲人師。自是登壇莅事，三十有八載。由我得度者，萬有餘人。人持寶衣，解瓔珞爲禮。公色受之，謂門弟子曰：彼以有相求我，我以有爲應之。凡建寶幢，修廢寺，飾大像，皆極其工。應物故也。元和十三年九月二十七日中夜，且湯沐剃頤頂，與門人告別卽寂。而視身與色，無有壞相。嗚呼！豈生能全我真，故死不速朽，將有願力邪？余不得而知也。問年八十二，問臘六十一，葬於寺東北隅。傳律弟子中巽道準，傳經弟子圓皎、貞璨，與其徒圓靜、文外、惠榮、明素、存政等，欲其師之道光且遠，故咨余乞詞，乃作長句偈以銘之曰：

祝融靈山禹所治，非夫有道不可止。中有毗尼出塵士，以津視儼猶孫子。登壇人師四十祀，南方學徒宗奧旨。幼無童心至兒齒，識滅形全異凡死。長沙潭西幾五里，陶侃故居石頭寺。門前一帶湘江水，吁嗟律席之名兮，與湘流而不已。

牛頭山第一祖融大師新塔記

初摩訶迦葉授佛心印，得其人而傳之。至師子比丘，凡二十五葉，而達摩得焉。東來中華，華人奉之爲第一祖。又三傳至雙峯信公，雙峯廣其道而岐之，一爲東山宗，能秀寂其後也。一爲牛頭宗，巖持威霍，林徑山其後也。分慈氏之一支，爲如來之別子，咸有祖稱，粲然貫珠。大師號法融，姓韋氏，延陵人，少爲儒，博極羣書。旣而歎曰：此仁誼言耳，吾志求出世間法，遂入句曲，依僧旻，改逢掖而緇之。徙居是山，晏坐石室，以慧力感通，故早麓泉涌，以神功示現，故皓雪蓮生。巨蛇摧伏，羣鹿聽法。貞觀中，雙峯過江，望牛頭頓錫曰：

此山有道氣。宜有得之者。乃來。果與大師相遇。性合神授。至於無言。同躋智地。密付真印。揭立江左。名聞九圍。學徒百千。如水歸海。由其門而爲天人師者。皆脈分焉。顯慶二年。報身示滅。道在後覺。神依故山。戒香不絕。龕坐未飾。夫豈不思乎。蓋神期冥數。必有所待。太和三年。潤州牧。浙江西道觀察使。檢校禮部尚書。趙郡李公。在鎮三閩。百爲大備。尙理信古。儒玄交修。始下令禁桑門。販佛以眩人者。而於真實相深達焉。常相大師像設。宜從本教。言自我啓。因自我成。乃召主吏。籍我月入。得緡錢二十萬。俾秣陵令如符經營之。三月甲子。新塔成。事嚴而工人盡。誠達而山神來護。願力旣從。衆心知歸。撞鐘告白。龍象大會。諸天聲香之蘊。如見如聞。卽相生敬。明幽同感。尙書欲傳信於後。遠命愚志之夫。上士解空而離相。中士著空而嫉有。不因相何以示覺。不由有何以悟無。彼達真諦。而得中道者。當知爲而不有。賢乎以不修爲無爲也。

袁州萍鄉縣楊岐山故廣禪師碑

天生人而不能使情欲有節。君牧人而不能去威勢以理。至有乘天工之隙。以補其化。釋王者之位。以遷其人。則素王立中區。一作樞之教。懋建大中。慈氏起西方之教。習登正覺。至哉。乾坤定位。而聖人之道。參行乎其中。亦猶水火異氣。成味也。同德輪轅異象。致遠也。同功。然則儒以中道御羣生。罕言性命。故世衰而寢息。佛以大悲救諸苦。廣啓因業。故劫濁而益尊。自白馬東來。而人知像教。佛衣始傳。而人知心法。私以權實。示其攝修。味真實者。卽清淨以觀空。存相好者。怖威神而遷善。厚於求者。植因以覲福。罹於苦者。證

業以銷冤。革盜心於冥昧之間。泯愛緣於死生之際。陰助教化。總持人天。所謂生成之外。別有陶冶。形政不及。曲爲調柔。其方可言。其旨不可得而言也。推四海之大。羣倫之富。必有以得其門而會其宗者。爲世導師焉。禪師諱乘廣。其生容州。姓張氏。七歲尙儒。以俎豆爲戲。十三慕道。遵壞削之儀。至衡陽。依天柱想公。以啓初地。至洛陽。依荷澤會公。以契真乘。洪鐘蘊聲。扣之斯應。陽燧含焰。晞之乃明。始由見性。終得自在。常謂機有淺深。法無高下。分二家者。衆生存頓漸之見。說三乘者。如來開方便之門。名自外得。故生分別。道由內證。則無異同。遂以攝化爲心。經行不倦。愍彼南裔。不聞佛經。由是結廬此山。心與境寂。應念以起教。隨方而立因。居涉旬而善根者知歸。逮周月而帶縛者漸悟。以月倍日。以年倍時。瘖矇洞聞。荒憬潛革。邑中長者。十方善衆。咸發信願。大其藩垣。法堂四阿。服引僧舍。身心恆寂。象馬交馳。墮其去來。皆得利益。踰嶺之北。涉湘而南。仰茲高山。知道有所在。此地緣盡。翛然化俱。神歸佛境。悲結人世。自趺坐而滅。至於茶毗。三百有六旬矣。瓜髮加長。容澤差衰。眞子號呼。圍繞薪火。得舍利如珠璣者。數千百焉。於戲。肖圓方之形。故寂滅以示盡。入菩提之位。故殊相以現靈。亦猶鳳毛成宇。鱗角生肉。必有以異。不知其然。於是服勤聞法之上。首曰甄升。乃率其徒圓寂。道弘如亮。如海等。相與杖淚具役。建塔於禪室之右端。從衆也。初廣公始生之辰。歲在丁巳。當玄宗之中元。生三十而受具。更臘五十二而終。終之夕。歲直戊寅。當德宗之後元。三月既望之。又十日也。後九年。其門人還源。以爲崇塔以存神。與建銘以垂休。皆憑像寄懷。不可闕一。謬謂余爲習於文者。故繭足千里。以誠相攻。大懼其先師德音與時寢遠。且曰。白月中黑。東川無

還。闕於金石。傳信百劫。彼墮淚之感。豈儒家者流專之。敬酬斯言。銘示真俗。文曰。如來說法。徧滿大千。得勝義者。強名爲禪。至道不二。主言無辯。心法東行。羣迷不變。七葉無嗣。四魔潛扇。佛衣生塵。佛法如線。吾師覺者。冥極道樞。承受密印。端如貫珠。一室寥然。高山之隅。爲法來者。千百人俱。裔民嗤嗤。戶有犀渠。攝以方便。家藏佛書。願力既普。度門斯盛。合爲一乘。散爲萬行。卽動求靜。故能常定。絕緣離覺。乃得究竟。生非我樂。死非我病。現滅者身。常圓者性。本無言說。付囑其誰。等空無得。後覺得之。像闕虛塔。迹留仁祠。十方四輩。瞻禮於斯。

夔州始興寺移鐵像記

佛薪盡於乾竺。而象教東行。是法平等。故所至爲淨土。是身應供。故隨念如降生。先是魚復人有以利金。爲彌勒像者。重千鈞。眸容瑞相。人天兩足。龜氏卒事。而它工未備。故寓於西偏。不知其幾年矣。寺僧法照。瞻禮發信。赤肩白足。入諸大城。乃至聚落。無空過者。積十餘年。得信財無量。繇是購工。以營巧。募徒而畢。力四輩增增。工麾以肱。中樞外脈。陰轉陽動。欵如地踊。岌如山行。大匠無言。尊客嚮明。青蓮承跣。金獸捧持。藻井花鬘。蔥蘢四垂。邑人膜拜。如佛出世。法照以願力能就。泣於佛前。因持片石。乞詞以示後。按此寺始於宇文周。初瀕江埤庫。皇唐神龍中。爲水所壞。有波邪賴耶國僧。廣照浮海而至。頓錫不去。遂移於今道場所。山曰磨刀嶺。曰虎岡。其經始與克修。皆蕃僧是力。後之有志者。豈無人哉。法照夔人。姓穆氏。年十有五出家。依江陵名僧受具。肇自貞元二十年甲申。歸此寺。願崇建有爲。凡修大殿。立菩薩大弟子侍佛。

左右。逮長慶癸卯有成。其善植德本者歟。

毗盧遮那佛華藏世界圖讚

佛說華嚴經。直入妙覺。不由諸乘。非大圓智。不能信解。德宗朝。有龍象觀公。能於是經了第一義。居上都雲華寺。名聞十方。沙門嗣肇。是其上足。以經中九會。纂成華藏圖。俾人瞻禮。卽色生敬。因請余讚之。卽說讚曰。

清淨不染花中蓮。捧持世界百億千。踴出香海浩無邊。風輪負之晝夜旋。大雄九會化諸天。釋梵八部來森然。從昏至覺不依緣。初初極極性自圓。寫之絹素色相全。是色非色言非言。

成都府新修福成寺記

益城右門街一無街字大達。坦然西馳。曰石笋街。街之北有仁祠。形焉直啓。曰福成寺。寺之殿臺與城之樓交錯相輝。縮於碧霄。望之如崑閬間物。大和四年。蜀帥非將材。不修邊備。南詔君長。謀得內空。乘隙入。闖於城下。或縱火以駭衆。此寺乃焚。高門修廊。委爲寒燼。如是者再歲。帝念坤維。丞相復來。山川如迎。父老相識。環視故地。寺爲焦墟。載興起廢之歎。爰有植因之願。乃命主倖吏。以吾綵錢三十萬。爲經營之基。自公來思。蜀號無事。時康歲稔。人樂檀施。公言旣先。應如決川。乃傾囊袖。乃出懷神。勝因化愚。慧力攝慳。男奔女驟。急於徵令。匠者度材。以指衆徒。藝者運思。以役衆技。斥鋸磨礱。丁丁登登。陶者儲精。圻者效能。欵自火宅。復爲金繩。沿故鼎新。因毀成妍。華夷縱觀。萬目同聳。旣告訖役。公來慶成。雲鮮日潤。輝映前後。於

是都人舞抃而謠曰。昔公去此。福成以燬。今公重還。福成復完。民安軍治。亦如此寺。庸可勿紀乎。公實聞斯言。遂折簡見命。謹月而日之。時大和某年某月日。大檀越具官封爵段氏。其它發大願者。程功董事者。自中貴人及賓寮。一作介將吏。若僧徒。偕籍之而刻於石。

劉賓客文集卷五

論

辯迹論

客有能通本朝之雅故者曰。時之污崇。一作隆視輔臣之用否。房與杜迹何觀焉。建官取士之制。地征口賦之令。禮樂刑法之章。因隋而已矣。二公奚施焉。余愀然曰。三王之道。猶夫循環。非必變焉。審所當救而已。隋之道。豈制置名數之間邪。顧名與事乖耳。因之何害焉。夫上材之道。非務所舉。必的然可使戶曉爲迹也。吾觀梁公之迹。章章如懸寓矣。曷然哉。請借一以明之。史不云乎。初太宗怒渾戎之橫於塞也。度諸將不足以必取。當宁而歎曰。得李靖爲帥快哉。靖時告老且病矣。梁公虛其心以起之。靖忘老與病。一舉虜其君。郡縣其地而還。夫非滅國之難能。起靖之難能也。靖非不克之爲慮。居功之爲慮也。古之爲將。度柄輕不足以遂事。重則嫌生焉。是以有辭第以見志。有多產以取信。有子質以滅貳。有嬖監以虞謗。其多患也如是。若靖者名旣成。位旣崇。重失畏。偏其患又甚焉。微梁公之能盡材。能捍患。能去忌。能照私。彼姑藉舊勞居素貴足矣。惡乎起哉。夫豈感空言而起邪。心相見久矣。夫豈飾小信而要邪。道相籠久矣。其後敬玄擅能。失材臣而敗隨之。林甫自便。進蕃將而亂隨之。由是而言。固相萬矣。子方規規然窺上材以戶曉之迹。此我之所不取也。若杜萊公者。在相位日淺。將史失其傳。然以梁公之鑒。裁自天策府。遂以王佐材

許之。則是又能以道籠房公者矣。房之許與迹孰甚焉。客無以應而作。子劉子曰。觀書者當觀其意。慕賢者當慕其心。循迹而求。雖博寡要。信矣。

明贊論

古之人動必有以將意。故贊之道。自天子達焉。夫芬芳在上。臭達於下。而溫粹無擇。有似乎聖人者。鬯也。故用於天子。清越而瑕不白。揜潔白而物莫能污。內堅剛而外溫潤。有似乎君子者。玉也。故用於諸侯。執之不鳴。刑之不鳴。似死義。乳必能跪。似知禮者。羔也。故卿執焉。在人之上。而有先後行列者。雁也。故大夫執焉。耿介而一志者。雉也。故士執焉。視其所執。而知其任。是故食愈重而志愈卑。位彌尊而道彌廣。耿介之志。唯士得以行之何也。務細而所試者寡。齒卑而所蔽者衆。言未足以動聽。故必傲發以取異。行未足以應遠。故必砥礪以沽聞。借今由士爲大夫。捨雉而執雁。其志也隨之。故耿介之名。不施於大夫矣。況其上乎。然則爲士也不思雉之介。爲卿也能思羔之禮歟。今夫或者不明分。推理而觀之。則曰。此居下而嗜直者。是必得志而稔其訐矣。彼當介而務宏者。是必處高而肥者德矣。曾不知訐當其分。則地易而自遷。宏非其所。則志遠而無制矣。於戲。責士以卿大夫之善。猶諭君以士之行耳。予以執贊之道。得其分。苟推分明矣。求刑賞之潛濫得乎。

華佗論

史稱華佗以恃能厭事爲曹公所怒。荀文若請曰。佗術實上人。命繫焉。宜議能以宥。曹公曰。憂天下無此

鼠輩邪。遂考竟。佗至蒼舒。病且死。見賢偏反醫不能生。始有悔之之歎。嗟乎。以操之明略。見幾。然猶輕殺材。能如是。文若之智力地望。以的然之理攻之。然猶不能返其悲。執柄者之悲。真可畏諸。亦可慎諸。原夫史氏之書於冊也。是使後之人寬能者之刑。納賢者之諭。而懲暴者之輕殺。故自恃能至有悔。悉書焉。後之惑者。復用是爲口實。悲哉。夫賢不能無過。苟實於理矣。或必有寬之之請。彼壬人皆曰。憂天下無材邪。曾不知悔之日。方痛材之不可多也。或必有惜之之歎。彼壬人皆曰。譬彼死矣。將若何。曾不知悔之日。方痛生之不可再也。可不謂大哀乎。夫以佗之不宜殺。昭昭然不待言也。獨病夫史書之義。是將推此而廣耳。我觀自曹魏以來。執死生之柄者。用一恚而殺材能衆矣。又烏用書佗之事爲。嗚呼。前事之不忘。期有勸且懲也。而暴者復藉口以快意。孫權則曰。曹孟德殺孔文舉矣。孤於虞翻何如。而孔融亦以應泰山殺孝廉自譬。仲謀近霸者。文舉有高名。猶以可懲爲故事。矧它人哉。

天論上

世之言天者二道焉。拘於昭昭者。則曰天與人實影響。禍必以罪降。福必以善來。窮阨而呼。必可聞。隱痛而祈。必可答。如有物的然以宰者。故陰隲之說勝焉。泥於冥冥者。則曰天與人實刺音辣異。霆震於畜木。未嘗在罪。春滋乎堇荼。未嘗擇善。跲躓焉而遂。孔顏焉而厄。是茫乎無有宰者。故自然之說勝焉。余之友河東解人柳子厚作天說。以折韓退之之言。文信美矣。蓋有激而云。非所以盡天人之際。故余作天論以極其辯云。大凡入形器者。皆有能有不能。天有形之大者也。人動物之尤者也。天之能人固不能也。人之能

天亦有所不能也。故余曰：天與人交相勝耳。其說曰：天之道在生植，其用在強弱；人之道在法制，其用是非。陽而阜生，陰而肅殺；水、火傷物，木、堅、金、利壯而武健，老而耗，耗氣，雄相君力，雄相長，天之能也。陽而蕪樹，陰而鞏斂，防害用濡，禁焚用光，斬材竅堅，液礦礪鋒，義制強訐，禮分長幼，右賢尚功，建極閑邪，人之能也。人能勝乎天者，法也。法大行，則是爲公，是非爲公，非天下之人蹈道必賞，違之必罰，當其賞，雖三旌之貴，萬鍾之祿，處之咸曰：宜何也？爲善而然也。當其罰，雖族屬之夷，刀鋸之慘，處之咸曰：宜何也？爲惡而然也。故其人曰：天何預乃事邪？唯告虔報本，肆類授時之禮，曰：天而已矣。福兮可以善取，禍兮可以惡召。奚預乎天邪？法小弛，則是非駁，賞不必盡善，罰不必盡惡，或賢而尊顯，時以不肖參焉；或過而僂辱，時以不辜參焉。故其人曰：彼宜然而信然，理也；彼不當然而固然，豈理邪？天也。福或可以詐取，而禍亦可以苟免。人道駁，故天命之說亦駁焉。法大弛，則是非易位，賞恆在佞，而罰恆在直，義不足以制其強，刑不足以勝其非。人之能勝天之具盡喪矣。夫實已喪而名徒存，彼昧者方挈挈然提無實之名，欲抗乎言天者，斯數窮矣。故曰：天之所能者，生萬物也；人之所能者，治萬物也。法大行，則其人曰：天何預人邪？我蹈道而已。法大弛，則其人曰：道竟何爲邪？任人而已。法小弛，則天人之論駁焉。今以一己之窮通，而欲質天之有無，惑矣。余曰：天恆執其所以臨乎下，非有預乎治亂云爾。人恆執其所以仰乎天，非有預於寒暑云爾。生乎治者，人道明，咸知其所自，故德與怨不歸乎天。生乎亂者，人道昧，不可知，故由人者舉歸乎天，非天預乎人爾。

天論中

或曰。子之言天與人交相勝。其理微。庸使戶曉。盍取諸譬焉。劉子曰。若知旅乎。夫旅者。羣適乎莽蒼。求休乎茂木。飲乎水泉。必強有力者先焉。否則雖聖且賢莫能競也。斯非天勝乎。羣次乎邑郛。求蔭於華樓。飽於饑牢。必聖且賢者先焉。否則強有力莫能競也。斯非人勝乎。苟道乎虞芮。雖莽蒼猶郛邑然。苟由乎匡宋。雖郛邑猶莽蒼然。是一日之途。天與人交相勝矣。我固曰。是非存焉。雖在野人。理勝也。是非亡焉。雖在邦天。理勝也。然則天非務勝乎人者也。何哉。人不宰則歸乎天也。人誠務勝乎天者也。何哉。天無私故人。可務乎勝也。我於一日之途而明乎。天人取諸近也已。或者曰。若是則天之不相乎人已信矣。古之人曷引天爲答曰。若知操舟乎。夫舟行乎濼溜伊洛者。疑徐存乎天。次舍存乎人。風之怒號。不能鼓爲濤也。流之泝洄。不能峭爲魁也。適有迅而安。亦人也。適有覆而膠。亦人也。舟中之人。未嘗有言天者。何哉。理明故也。彼行乎江河淮海者。疾徐不可得而知也。次舍不可得而必也。鳴條之風。可以沃日。車蓋之雲。可以見怪。恬然濟亦天也。黯然沈亦天也。阨危而僅存亦天也。舟中之人。未嘗有言人者。何哉。理昧故也。問者曰。吾見其駢焉而濟者。風水等耳。而有沈有不沈。非天曷司歟。答曰。水與舟二物也。夫物之合并。必有數存乎其間焉。數存然後勢形乎其間焉。一以沈一以濟。適當其數乘其勢耳。彼贊之附乎物而生。猶影響也。本乎徐者其勢緩。故人得以曉也。本乎疾者其勢遽。故難得以曉也。彼江海之覆。猶伊溜之覆也。勢有疾徐。故有不曉耳。問者曰。子之言數存而勢生。非天也。天果狹於勢邪。答曰。天形恆圓。而色恆青。周回可以

度得晝夜可以表候。非數之存乎。恆高而不卑。恆動而巳。非勢之乘乎。今夫蒼蒼然者。一受其形於高。大而不能自還於卑。小一乘其氣於動用。而不能自休於俄頃。又惡能逃乎數而越乎勢邪。吾固曰。萬物之所以爲無窮者。交相勝而已矣。還相用而已矣。天與人萬物之尤者耳。問者曰。天果以有形而不能逃乎數。彼無形者。子安所寓其數邪。答曰。若所謂無形者。非空乎。空者形之希微者也。爲體也不妨乎物。而爲用也。恆資乎有。必依於物而後形焉。今爲室廬而高厚之形藏乎內也。爲器用而規矩之形起乎內也。音之作也有大小。而響不能踰表之立也。有曲直而影不能踰非空之數歟。夫目之視。非能有光也。必因乎日月火炎而後光存焉。所謂晦而幽者。目有所不能燭耳。彼狸狽犬鼠之目。庸謂晦爲幽邪。吾固曰。以目而視。得形之粗者也。以智而視。得形之微者也。烏有天地之內有無形者邪。古所謂無形。蓋無常形耳。必因物而後見耳。烏能逃乎數邪。

天論下

或曰。古之言天之歷象。有宣夜。渾天。周髀之書。言天之高遠卓詭。有鄒子。今子之言。有自乎。答曰。吾非斯人之徒也。大凡入乎數者。由小而推大。必合。由人而推天亦合。以理揆之。萬物一貫也。今夫人之有頭。目耳。鼻。齒。毛。頤。口。百骸之粹美者也。然而其本在乎腎腸心腹。天之有三光懸寓。萬象之神明者也。然而其本在乎山川五行。濁爲清母。重爲輕始。兩位既儀。還相爲庸。噫爲雨露。噫爲雷風。乘氣而生。羣分彙從。植類曰生。按。俞書傳云。海隅蒼生。謂草木也。動類曰蟲。倮蟲之長。爲智最大。能執人理。與天交勝。用天之利。立人之紀。紀綱

或壞復歸其始。堯舜之書。首曰稽古。不曰稽天。幽厲之詩。首曰上帝。不言人事。在舜之庭。元凱舉焉。曰舜用之。不曰天授。在殷中宗。襲亂而興。心知說賢。乃曰帝賚。堯民之餘。難以神誣。商俗已訛。引天而駭。由是而言。天預人乎。

附柳宗元天說

諱愈謂柳子曰。若知天之說乎。吾爲子言天之說。今夫人有疾痛。僂辱飢寒甚者。因仰而呼天曰。殘民者昌。佑民者殃。又仰而呼天曰。何爲使至此極戾也。若是者。舉不能知天。夫果蓏飲食。旣壞。蟲生之人。之血氣敗逆。墜底爲癰。瘍疣贅癩痔。蟲生之。木朽而蝸中。草腐而螢飛。是豈不以壞而後出邪。物壞。蟲由之生。元氣陰陽之壞。人由之生。蟲之生。而物益壞。食齧之。攻穴之。蟲之禍物也。滋甚。其能去之者。有功於物者也。蕃而息之者。物之讎也。人之壞。元氣陰陽也。亦滋甚。墾原田。伐山林。鑿泉以井飲。竅墓以送死。而又穴爲堰洩。築爲牆垣。城郭臺榭。觀游疏爲川瀆。溝洫陂池。燧木以燔。革金以鎔。陶甄琢磨。倅然使天地萬物不得其情。倅倅衝衝。攻殘敗撓。而未嘗息。其爲禍。元氣陰陽也。不甚於蟲之所爲乎。吾意有能殘斯人。使日薄歲削。禍元氣陰陽者。滋少。是則有功於天地者也。蕃而息之者。天地之讎也。今夫人舉不能知天。故爲是呼且怨也。吾意天聞其呼且怨。則有功者。受賞必大矣。其禍焉者。受罰亦大矣。子以吾言爲何如。柳子曰。子誠有激而爲是邪。則信辯且美矣。吾能終其說。彼上而玄者。世謂之天下。而黃者。世謂之地。渾然而中處者。世謂之元氣。寒而暑者。世謂之陰陽。是雖大。無異果蓏癰痔草木。

也。假而有能去其攻穴者。是物也。其能有報乎。蕃而急之者。其能有怒乎。天地大果。菘也。元氣大癘。痔也。陰陽大草木也。其烏能賞功而罰禍乎。功者自功。禍者自禍。欲望其賞罰者。大謬呼。而怨欲望其哀且仁者。愈大謬。子而信子之仁義。以遊其內生而死爾。烏置存亡得喪於果。菘癘痔草木邪。

劉賓客文集卷六

論

因論七篇

劉子閒居作因論。或問其旨。曷歸歟。對曰。因之爲言。有所自也。夫造端乎無形。垂訓於至當。其立言之徒。放詞乎無方。措旨於至適。其寓言之徒。蒙之智不逮於是。造形而有感。因感而有詞。匪立匪寓。以因爲目。因論之旨也。云爾。

鑒藥

劉子閒居。有負薪之憂。食精良。弗知其旨。血氣交沴。煬然焚如。客有謂子。子病病積日矣。乃今我里有方士。淪跡於醫。厲者造焉。而美肥。蹶者造焉。而善馳。矧常病也。將子詣諸子。然之。之醫所切脈觀色。聆聲。參合而後言曰。子之病。其與居之節外。衣食之齊去聲。乖所由致也。今夫藏鮮能安穀。府鮮能母氣。徒爲美疹之囊囊耳。我能攻之。乃出藥一丸。可兼方寸。以授子曰。服是足以淪昏煩而鉏蘊結。銷蠱隱而歸耗氣。然中有毒。須其疾瘳而止。過當則傷和。是以微其齊也。子受藥以餌。過信而腿能輕。痺能和。涉旬而疴癢絕焉。抑搔罷焉。踰月而視分纖。聽察微。蹈危如平。嗜糲如精。或聞而慶子。且閔言曰。子之獲是藥。幾神乎。誠難遭已。願醫之態。多齋術以自貴。遺患以要財。盍重求之。所至益深矣。子昧者也。泥通方而狃既效。猜至

誠而惑。剿說卒行其言。逮再餌半旬。厥毒果肆。岑岑周體。如店作焉。悟而走諸醫。醫大吒曰。吾固知夫子未達也。促和蠲毒者投之。濱於殆而有喜。異日進和藥。乃復初。劉子慨然曰。善哉醫乎。用毒以攻疹。用和以安神。易則兩躡明矣。苟循往以御變。昧於節宣。奚獨吾儕小人理身之弊而已。

訊毗

劉子如京師。過徐之右鄙。其道旁午。有毗增增。扶班白。挈羈角。齋生器。荷農用。摩肩而西。僕夫告子曰。斯宋人。梁人。毫人。潁人之逋者。今復矣。予愕而訊云。予聞隴西公。賜穀之止。方踰月矣。今爾曹之來也。欣然似恐後者。其聞有勞。俸之簿歟。獨復之條歟。振贍之格歟。碩鼠亡歟。瘵狗逐歟。曰。皆未聞也。且夫浚都。我政之上游也。自巨盜間。釁而武臣顛焉。牧守由將校以授。皆虎而冠。子男由胥徒以出。皆鶴而軒。故其上也。子視卒而芥視民。其下也。驚其理而蚌其賦。民弗堪命。是軼於它土。然咸重遷也。非阽危擠壑。不能違之。曩者雖歸歟。成謠而故態相沿。莫我敢復。今聞吾帥。故爲丞相也。能清靜畫一。必能以仁蘇我矣。其佐嘗宰京邑也。能誅鉏豪右。必能以法衛我矣。奉斯二必而來歸。惡待事實之及也。予因浩歎曰。行積於彼。而化行於此。實未至而聲先馳。聲之感人。若是之速歟。然而民知至至矣。政在終終也。嘗試論聲實之先後。曰。民黠政頗。須理而後勸。斯實先聲後也。民離政亂。須感而後化。斯聲先實後也。立實以致聲。則難在經始。由聲以循實。則難在克終。操其柄者。能審是理俾先後終始之不失。斯誘民孔易也。

歎牛

劉子行其野。有叟牽跛牛於蹊。偶問焉。何形之塊歟。何足之病歟。今穀棘然將安之歟。叟攬糜而對云。塊其形。飯之至也。病其足。役之過也。請爲君畢詞焉。我儻車以自給。嘗驅是牛引千鈞。北登太行。南並商嶺。掣以回之。叱以聳之。雖涉淖躋高。穀如蓬而轉不償。及今廢矣。顧其足雖傷。而膚尙腴。以畜豢之。則無用以庖視之。則有贏。伊禁焉。莫敢尸也。甫聞邦君饗士。卜剛日矣。是往也。當要^平售於宰夫。余尸之曰。以叟言之。則利。以牛言之。則悲。若之何。予方窶。且無長物。願解裘以贖。將置諸豐草之鄉。可乎。叟矍然而哈曰。我之活是。屈指計其直。可以持醪而鬻肥。飴子而衣妻。若是之逸也。奚事裘爲。且昔之厚其生。非愛之也。利其力。今之致其死。非惡之也。利其財。子惡乎落我事。劉子度是叟不可用。詞屈。乃以杖叩牛角而歎曰。所求盡矣。所利移矣。是以員能霸。吳屬鏤。賜斯旣。帝秦五刑具。長平威振。杜郵死。垓下敵擒。鍾室誅。皆用盡身賤。功成禍歸。可不悲哉。可不悲哉。嗚呼。執不匱之用。而應夫無方。使時宜之。莫吾害也。苟拘於形器。用極則憂明已。

傲舟

劉子浮於汴。涉淮而東。亦旣釋紼。纜榜人告予曰。方今湍悍而舟鹽。宜謹其具以虞焉。予聞言若厲。繇是柶以窒之。灰以瑾之。麩以乾之。僕怠而躬行。夕惕而晝勤。景蠶晶而莫進。風異響而遽止。兢兢然累辰。是用獲濟。假檣引櫂。次於淮陰。於是舟之工咸沛然自暇自逸。或遊肆而觴矣。或拊橋而歌矣。隸也。休役以高寢矣。吾曹無虞以晏息矣。逮夜分而歟。隙潛澍。渙然陰潰。至乎淹篋濡薦。方卒愕傳呼。跣跳登墟。僅以

身脫目未及瞬。而樓傾軸墊。抵於泥沙。力莫能支也。劉子缺然自視而言曰。曷予兢惕也。汨洪漣而無害。今予晏安也。蹈常流而致危。畏之途果無常所哉。不生於所畏。而生於所易也。是以越子膝行。吳君忽晉。宣尸居。魏臣怠。白公厲劍子西。哂李園養士春申易。至於覆國夷族。可不儆哉。嗚呼。禍福之胚胎也。其動甚微。倚伏之矛盾也。其理甚明。困而後儆。斯弗及已。

原力

劉子于邁。舟次泗濱。維紆邇之於傳。傳吏適傳呼曰。乘驛者方來。誰何之。則曰力人也。雅以力聞於吳楚間。中貴人器之。謂宜爲爪士。獻言於上。有旨趣如京師。頃其至。則佗焉五輩。咸碩其體。毅其容。動睛睜如曳趾。岌如顧瞻。遲回飲啜有聲。泗濱守伾。由將授也。說而勞之。饗以大牢。飲以百壺。酒酣氣振。求試自矜。傍如無人。中若有馮。有盪舟如沿者。挾鼎如飛者。絢鍵如麻者。開兩弧而脈不僨者。履巨石而齊如流者。異哉。果以力駭世。而聞於上也。異日話於儒家者流。有客怩然自奮曰。斯誠力矣。上之不過誇胡人而戲角抵。次之不過倅期門而振衲服。我之力異。然以道用之。可以格三苗而賓左衽。以威用之。可以係六羸而斷右臂。由是而言。彼力也。長雄於匹夫。然猶驛其駢。餼其食。我力也。無敵於天下。亦當蒲其輪。鶴其書矣。子詰之曰。彼之力用於形者也。子之力用於心者也。形近而易見。心遠而難明。理乎而言。則子之力大矣。時乎而言。則彼之力大矣。且夫小大迭用。曷常哉。彼固有小矣。子固有大矣。子所不能齊也。客於邑垂涕洟。劉子解之曰。屠羊於肆。適味於衆口也。攻玉於山。俟知於獨見也。貪日得。則鼓刀利。要歲計。而韞積。

多。客聞之破涕曰。我方俟多於歲計也。歲歟歲歟。其我與歟。

說驥

伯氏佐戎於朔隰。獲良馬以遺予。予不知其良也。秣之稊粃。飲之汚池。廋櫪也。上痺而下蒸。羈絡也。縶索而續韋。其易之如此。予方病且窶。求沾於肆。肆之馭亦不知其良也。評其價六十緡。將劑矣。有裴氏子贏。其二以求之。謂善價也。卒與裴氏。裴所善李生。雅挾相術。於馬也尤工。覩之周體。怡然視。听然笑。既而扞隨之。且曰。久矣。吾之不覩於是也。是何柔心勁骨。奇精妍態。宛如鏘如。曄如。翔如。之備邪。今夫馬之德也。全然矣。顧其維駒。藏銳於內。且秣之乖方。是用不說乎。常目須其齒。備而氣振平聲。則衆美灼見。上可以獻帝。閑次可以鬻千金。裴也。聞言竦焉。遂徹其僕。獨其阜筐。其惡。屨其搜。權以美薦。秣以薺粒。起之居之。澡之。扼音震之。無分陰之怠。斯以馬養馬之至分也。居無何。果以驥德聞。客有唁予以喪其寶。且譏其所買也。微予灑然曰。始予有是馬也。予常馬畜之。今予易是馬也。彼寶馬畜之。寶與常在所遇耳。且夫昔之翹陸也。謂將蹄齧。抵以糶策。不知其籟雲也。昔之噓吸也。謂爲疵爲癘。投以藥石。不知其噴玉也。夫如是。則雖曠日歷月。將至頓踣。曾何寶之有焉。繇是而言。方之於士。則八十其緡也。不猶踰於五殺皮乎。客謾而竦。予遂言曰。馬之德也。存乎形者也。可以目取。然猶爲之若此。矧德蘊於心者乎。斯從古之歎。予不敢歎。

述病

劉子嘗涉暑而征。熱攻於腠。以致病。其僕也告痛。亦莫能興。逮浹日。子有瘳。醫診之曰。疾幸間矣。顧熱診而未平。有遺類焉。宜謹於攝衛。衛之乖方。則病復矣。所苦旣微。而怠其說。倦眠於衾而興焉。倦隱於几而步焉。面不能罷頰。髮不能捐櫛。口不能忘味。心不能無思。如是未移日。而疾也。瘳疎如復瘳於躬。進藥求汗。凡三渙。然後日能視。視旣分。則嚮時之僕。已睨然執楛。圈侍子於前矣。子訝而曰。曩吾與若也。病偕呻也。諱也。若酷而吾微。藥也。餌也。吾殷而若薄。何患之同而痊之異哉。僕諄諄而答云。己之被病也。兀然而無知。有間也。亦兀然而無知。髮蓬如而忘乎亂。面黔如而忘乎垢。洎疾之殺也。雖飲食是念。無滑甘之思。日致復初。亦不知也。予喟然歎曰。始子有斯僕也。命之理畦。則蔬荒。主庖則味乖。顯廢則馬瘠。常謂其無適能適。乃今以兀然而賢我遠甚。利與鈍果相長哉。僕更矣。劉子遂言曰。樂於用。則豫章貴。厚其生。則社稷賢。唯理所之。曾何膠於域哉。

劉賓客文集卷七

論

辯易九六論

乾之爻皆九而坤六何也。世之儒曰：我聞諸孔穎達云：陽尊得兼乎陰，陰不得兼乎陽也。它日子與董生言及易，生曰：我聞諸畢中和云：舉老而稱也。請徵諸撰著。夫端策者，一變而遇少，與歸奇而爲五，再變而遇少，與歸奇而爲四，三變如之，是老陽之數，分措於指間者，十有三策焉。其餘三十有六，四四而運，得九是已。故易繫注云：乾一爻三十六策也。一變而遇多，與歸奇而爲九，再變而遇多，與歸奇而爲八，三變如之，是老陰之數，分措於指間者，二十有五策焉。其餘二十有四，四四而運，得六是已。故易繫注云：坤一爻二十四策也。借如一變而遇少，再變三變而遇多，是少陽之數，分措於指間者，二十有一策。其餘二十有八，四四而運，得七，一變而遇多，再變三變而遇少，是少陰之數，分措於指間者，十有七策。其餘三十有二，四四而運，得八，故九與六爲老，老爲變爻，七與八爲少，少爲定位，故曰舉老而稱，亦曰尙變而稱。且夫筮爲乾者，常遇七，斯乾矣。常遇九，斯得坤矣。筮爲坤者，常遇八，斯坤矣。常遇六，斯得乾矣。在左氏國語有之。晉公子親筮之曰：尙有晉國，得貞屯，悔豫，皆八，八非變爻，故不曰有所之。按坎二世而爲屯，屯之六二爲世爻，震一世而爲豫，豫之初六爲世爻，屯之二，豫之初，皆少陰不變，斯非八乎。卦由老數，而舉曰六，筮由

著數。故斥曰八在左氏春秋傳有之曰。穆姜薨于東宮。始往而筮之。遇艮之八。史曰。是謂艮之隨。夫艮三
艮上。之隨三三。震下。唯二不動。斯遇八也。餘五位皆九六。故反焉。筮法以少為卦。主變者五而定者一。
 故以八為占。艮之六二曰。艮其腓。不拯其隨。其心不快。史以為東宮實幽也。遇此為不利。故從變爻而占。
 苟以說于姜也。何則。卦以少為主。若定者五而變者一。即宜曰之某卦。觀之否。師之臨類是也。變與定均。
 即決以內外。今變者五。定者一。宜從少占。懼不吉而更之。故曰。是謂艮之隨。是謂之云者。苟以說也。故穆
 姜終死于東宮。與艮會耳。而杜元凱於此注。以為雜用三易。故有遇八之云。非臻極之理也。劉子曰。余與
 董生言九六之義。信與理會。為不誣矣。余又於左氏二書參焉。若合形影。然而世人往往攘臂于其間曰。
 生之名孰與穎達著邪。而材孰與元凱賢邪。歷載曠日。未嘗有聞人明是說者。雖余憤然用口舌爭。時貌
 從者什一二焉。嗟乎。由數立文。所如皆合。昭昭乎若觀三辰。其不晦也如此。然猶貴聽而賤視。斷斷五軒
 然莫可更也。矧無形之理。不可見之道邪。余獨悲而志之。以俟夫後覺。初董生言本畢中和。中和本其師。
 師之學本一行云。

第一指。餘一益二。餘二益二。第二指。餘一益二。餘二益一。第三指。與第二
餘三益一。餘四益四。餘四益三。 第三指。指同。

右卦從下起。指亦自下始。第一指法地。故益成偶。第二法天。故益成奇。第三人極。法天故同。

第一指。遇一益三。并掛一為五。遇第二指。遇一益二。并掛一為四。第三指。遇一益二。并掛一為四。

右三指俱遇少。通計十三策。其餘三十六策。四四運之。得九為老陽。故易繫云。乾之策二百一十有

六。注云陽爻九。一爻三十六策。爻二百一十有六。

第一指。遇四益四。與第二指。遇四益三。與掛一。第三指。遇四益一。與掛一。

右三指俱遇多。通計二十五策。其餘二十四策。四四運之。得六爲老陰。故易繫云。坤之策百四十有

四。謂陰爻六一。爻二十四策。六爻一百四十有四。

第一指。遇一益三。并第二指。遇四益三。并第三指。遇四益三。并

右初指少。第二第三指多。以少爲主。通計二十一策。其餘二十八策。四四運之。得七爲少陽。

第一指。遇四益四。并第二指。遇一益二。并第三指。遇一益二。并

右初指多。第二第三指少。以多爲主。通計一十七策。其餘三十二策。四四而運。得八爲少陰。

第一指。遇少。謂一二。第二指。遇多。謂三四。第三指。遇少。謂一二。

右初指少。第二指多。第三指又少。以多爲主。通計一十七策。其餘三十二策。四四而運。得八爲少陰。

第一指。遇多。謂四九。第二指。又遇多。謂三八。第三指。遇少。謂一二。

右初指第二指並多。第三指獨少。以少爲主。通計二十一策。其餘二十八策。四四運之。得七爲少陽。

第一指。遇少。止於五。第二指。又遇少。止於四。第三指。遇多。止於八。

右初指二指並少。三指獨多。以多爲主。通計一十七策。其餘三十二策。四四運之。得八爲少陰。

右揲蓍數

穆姜薨于東宮。始往而筮之。遇艮之八。史曰：是謂艮之隨。夫艮^三艮^下之隨^三。艮^上。唯六二爻不動。餘五盡變。變者遇九六也。二不動者遇八也。

晉公子親筮之曰：尚有晉國。得貞屯悔豫。皆八。夫屯^三坎^下上。六位盡不遇。六九故不動。既無所之。卽以

世爻爲占。按屯是坎宮二世卦。如以一爲占。則遇八。夫豫^三震^下上。是震宮一世卦。以初六爲占。亦遇八。

韋昭於此注云：內曰貞。外曰悔。震下坎上爲屯。坤下震上爲豫。言得此兩卦。震在屯爲貞。在豫爲悔。八謂

震兩陰爻。在貞在悔皆不動。所以筮史占之。謂閉而不通者。爻無爲也。乾之策二百一十有六。^{謂陽爻九}

六策。六爻當二百一十六。坤之策一百四十有四。^{謂陰爻六一爻二十四策。六爻當百}

言三十六者。舉老陽也。凡三百有六十。當

其之日。二篇之策。萬有一千五百二十。當萬物之數。六十四卦。都三百六十四爻。陰陽相半。各一百九十二爻。陽爻一爻三十六策。合爲六千九百一十二。陰爻一爻二十四策。合爲四千六百八

右六九之數

一行大衍論云：三變皆剛。太陽之象也。三變皆柔。太陰之象也。一剛二柔。少陽之象也。一柔二剛。少陰之

象也。少陽之剛。有始有壯。有究少陰之柔。有始有壯。有究。因綜四象之變。而成八象焉。八象之位。而八卦

之本列矣。注云：太陽始動。施于太陰。而生震象之七。^{謂少陽之七。爲震初九。}再動于壯。而生坎象之七。^{謂再索而}

動于究。而生艮象之七。^{謂三索而得男也。}太陰始動。施于太陽。而生巽象之八。^{謂少陰之八。爲巽初六。}再動于壯。而生離象

之八。^{謂再索而得女也。}三動于究。而生兌象之八。^{謂三索而得女也。}是以九六七八分爲八象。

右論大衍

國語又云。董因迎公于河。公問焉曰。吾其濟乎。對曰。臣筮之。得泰之八。曰。是謂天地配亨。小往大來。今及之矣。何不濟之有。韋昭云。泰三至五。震象爲侯。陰爻不動。其數皆八。與貞屯悔豫義同。劉子曰。昭此說用互體有震。按董因之言。天地配亨。是六五帝乙歸妹。以祉元吉之爻。夫泰乾坤體全。內外位正。內爲身。外爲事。卜得國事也。以外卦爲占。六五居尊位。故統論卦下辭曰。小往大來。爻遇歸妹。故曰。天地配亨。何必取互體也。

右與董生言易

劉賓客文集卷八

記

天平軍節度使廳壁記

元和十四年春二月王師平河南負固之地十有二州憲宗視地圖戶版俾參其地三月有詔其以曹濮隸鄆爲一隅按部三軍統兵三萬乃新其軍錫號天平蓋承天威以平暴悖志動揚休在稱爲雄新邦始徠汚俗猶用朝廷革之以漸故命功臣或辦吏以帥焉大和三年冬天平監軍使以故侯病聞上方注意治本乃以牙璋玉節鼎右僕射官稱賜東都留守令狐公曰子擇文武惟汝兼前年鎮汴州有顯庸往年弼憲宗有素貴徒得君重剛吾四支公再拜稽首登車有耀不踰旬抵治所夾清河而域之惟鄆州在春秋爲須句之國涉漢爲濟東蓋禹貢兗州之域宣精在上奎爲文宿晝野在下魯爲儒鄉故其人知書風俗信厚天寶末大憝起於幽都虜將因兵鋒取其地右勇左德積六十年公之來思如古醫之治劇病宣洩頤養氣還神復大凡抗詔條國式於身以先之示非約以裕人信賞罰以格物物力日完人風自移涉月報政踰年鼎治牙門之容暨暨而恭壘門之容仡仡而和里中之容闐闐而遂勞者以安去者以歸分星不搖田祖降福凡革前非罷供第無名錢歲鉅萬菽粟如之錦繒且千兩去苛法急徵毀家償租之令故流庸自占四萬室衆無吁咨和氣乃來三田仍稔草木咸瑞堂偶爾哉初斯堂西墉有刺史記而元戎

雄尊之位。虛其左方。豈有待邪。公命愚志之。俾來者仰公知變風之自。大和五年夏四月二十六日記。

汴州刺史廳壁記

本朝以浚儀爲汴州刺史治所。自隋醜新渠。吸黃河而東行。州含其樞。爲天下劇。內屏王室。東雄諸侯。居無事時。常帶廉察使。兵興已還。益以節施。用人得否。繫國輕重。長慶四年。詔書命河南尹燉煌令狐公來莅來刺。錫之介圭。使印兵符。汴人交賀。肴醜騰貴。惟是邦始都於魏。惠王始郡於宇文。周星躔回環。天駟垂光。地爲四戰。故其俗右武。人具五都。故其氣習豪。公自爲宰相時。已熟四方之利病。凡所戾止。參然前知。既視事三日。揖羣吏與之言曰。我食止圭田。吾用止公入。凡它給過制。傷廉浼潔者。悉罷之。壹歸乎公藏。凡曲防苛禁。不情乖體者。悉剗之。壹出乎令典。凡關征船算。奪時專利者。悉更之。壹遵乎詔條。然後刑麗事而詳賞。以時而均興學。以勸藝。示寬以化勇。居數月。而汴州人恂恂然無復故態。明年大成。議者若曰。奕奕浚都。國之咽喉。咀清嘯和。旁暢四支。東夏黠馬。由我以肥。是浚之治。非所澤於所履而已。初公七代祖。在隋爲納言。大業中。持節居此。亦號刺史。距今餘二百年。公實能似。既拜闕。發魚書。合左右契。由阼階躋。遐踵前武。欻然如聞其馨香。肅然如覩其形容。信乎君子之澤。遠而有光輝也。它日命遊梁客志之。書於廳事。謹按前賢之在此堂者。張平原首之。陸氏撰節度使記。揭於東壁。詳矣。今公命爲刺史。記書於右端。謹月而日之。以公爲冠。大和九年一作元年夏五月某日記。

國學新修五經壁本記

初大歷中名儒張參爲國子司業始定五經書於論堂東西廂之壁辯齊魯之音取其宜考古今之文取其正繇是諸生之師心曲學偏聽臆說咸束之而歸於大同揭揭高懸積六十歲崩剝汚穢泮然不鮮今天子尙文章尊典籍於苑囿不加尺椽而成均以治國學上言遽賜千萬時祭酒皞實尸之博士公肅實佐之國庠重嚴過者必式遂以羨贏再新壁書懲前士塗不克以壽乃析堅木負墉而比之其制如版牘而高廣其平如粉澤而潔滑背施陰關使衆如一附離之際無迹而尋堂皇靚深兩廡相照申命國子能通法書者分章揆日遜其業而繕寫焉筆削旣成讎校旣精白黑彬彬瞭然飛動以蒙來求煥若星辰以敬來趨肅如神明以疑來質決若蓍蔡由京師而風天下覃及九譯咸知宗師非止服逢掖者鑽仰而已於是學官陳師正等賢生徒凡四百二十有八人請金石刻且歌之曰

我有學宇旣傾而成之我有壁經旣昧而明之孰規摹之孰發揮之祭酒維齊博士維韋俾我學徒弦歌以時切切祁祁不敖不嬉庶乎適人來采我詩時余爲禮部郎凡誓宗之事得以關決故書之以移史官宜附於藝文云

汴州鄭門新亭記

亭於西門尊闕路也實相公以心規羣僚以辭叶而百工以樂成斧斤無聲丹素有嚴主人肅客落以金石走鄭之門嶽爲右垣黃河一支滉漾北軒前瞻東顧薨動軌直含景生姿遡空欲翔汴城具八方之人殊形詭言而耳目一說初公來臨擁節及門馭吏曰此鄭州門公心非之若曰野哉居無何卽舊號而更

之曰鄭門故事王人大僚之去來元侯前驅翊門而旋率立馬塵盆中挹策爲禮公心不然之乃下亭令於執事按亭東西函丈者三之有奇而南北五之有贏樂縣宴豆前後以位基園對明引掖順時修梁衡建中虛上荷圓脊方廉高卑中經簾鑑茵帟文樨睨榻儲以應猝周用而宜乃命尹闡視亭長抱關視掌固啓閉拚除是謹是致錫命賜胙勞迎贈餞我當躬行汝先汝獨挾膳提醪生芻縞衣我寮展事靡問文武汝唯汝從凡入而修容凡出而修輶裼襲威儀勿藉勿訶繇是貴人稱諸朝羣吏詠於家行者誇於道與人同其安者人人驛其聲而吟之始乎譏議而成乎龐鴻欲無文字不可也公遂條白其所以然遂作遺命學古者書之公姓令狐氏以文章典內外書命以謨明登左右相以飛語策免以思材復徵自有浚師無如今治文武兩熾其古之大臣歟

鄭州刺史東廳壁記

古諸侯之居公私皆曰寢其它室曰便坐今凡視事之所皆曰廳其它室以辨方爲稱今年鄭州刺史楊君作東廳旣成而落之且以書抵余爲記按國章以甲乙第方域大凡環天子之居爲雒州鄭實邇王畿故望雄視其版多貴人且當大達故務劇君侯始來三日司稅掾舉七縣董租之吏累百君曰此百臚也悉罷之用戶符而輸入益辦司貢掾舉梨林之征請戶曉君曰盡弛之勿籍用平賈而果益精里無吏迹民去痼疾授牘占租如臨詛盟土毛人力日夕相長故周歲而完焉比年而愈肥雖軍興餽輓旁午大將牙旗往復相踵而里中清夷雞犬音和人旣甯而物有餘政旣成而日多暇圓視舊宇宜有更之且書

得時亦以謹始。因列名氏授受。月而日之。庶乎繼踐於茲者。知貫珠之首。其山望澤浸。土風毗俗。與前賢之耿光。備於正位。有天寶中詞人杜顓之文在。大和四年某月日。

管城新驛記

大和二年閏三月。滎陽守歸厚上言。臣治所直天下大達。肘武牢而咽東夏。誰何宜謹。啓閉宜度。先是驛於城中。驛遞不時。四門牡鍵。通夕弗禁。請更於外隧。永永安。制曰可。守臣奉詔。無徵命。無奪時。糜羨財。募游手。逮八月。旣望新驛成。鄭人胥說。琢石而紀曰。右兌之方面。玄負陽。門衝周道。牆蔭行栗。一作牆。一作桑。境勝於外也。遠購名材。旁延世工。暨塗宣皙。瓴甃剛滑。術精於內也。遽廬有甲乙。牀帳有冬夏。庭容牙節。廡臥囊囊。示禮而不恩也。內庖外廡。高倉邃庫。積薪就陽。峙芻就燥。有素而不愆也。主吏有第。役夫有區。師行者有饗亭。擊行者有別邸。周以高墉。乃樓其門。勞迎展蠲潔之敬。餞別起登臨之思。溱洧波瀾。嵩邱雲煙。四時萬象。來貺於我。走轂奔蹄。邁征急宣。入而忘勞。出必屢顧。其傳舍之尤乎。太守姓楊氏。字貞一。華陰弘農人。鄭爲雒州。非聞人大吏。不得在其選。夫驛之宜選於外也。前此二千石嘗言之。而重改作。若貞一可謂果於從政。而決行其言。惜乎未施於大也。

和州刺史廳壁記

歷陽古揚州之邑。於天文直南斗魁下。在春秋實句吳之封。後爲楚所取。秦并天下。以隸九江。而吳亦一作爲九江治所。晉平吳。復隸淮南。至永興初。自析爲郡。益之以烏江。宋臺建。目爲南豫州。又益之以龍亢。梁

之亡。北齊圖霸功。擁貞陽侯以歸。王僧辯來迎。會於茲地。二國和協。故更名和州。陳隋間無所革。國朝因隋。武德中更龍亢爲含山。初開元詔書。以口算第郡縣爲三品。是爲下州。元和中復命有司參校之。遂進品第一。按見戶萬八千有奇。輸緡錢十六萬。歲貢織紵二篋。吳牛蘇二鈞。糝鱒九甕。茅蒐七千兩。鎮曰梁山。浸曰歷湖。田蕝四穀。篆全六擾。廡有旨酒。庖有腴魚。神仙故事。在郊在藪。玄元有臺。彭鏗有洞。名山曰雞籠。名塢曰濡須。異有血鬪。祥有沸井。城高而堅。亞父所營。州師五百。環峙於東南。瀕江。劃中流爲水疆。揭旗樹纛。十有六戍。自孫權距陳。出入六代。常爲宿兵之地。多以材能人處之。本朝混一。號爲善部。然用人差輕。非復曩時之比也。始余以尙書郎得譴。刺連山。今也由巴東來牧。考前二邦之籍。與版圖。纒什五六。而地征三之。究其所從來。生植有本。女工尙完。堅一經一緯。無文章交錯之奇。男夫尙墾闢。功苦戀本。無卽山近鹽之逸。市無嗤眩。工無彫彤。無游人異物。以遷其志。副徵令者。率非外求。凡百爲一出於農桑。故也。繇是而言。瘠天下者。其在多巧乎。寶歷元年六月二十一日。刺史中山劉某記。

山南西道節度使廳壁記

文皇帝初元。始畫天下爲十道。古荆梁之地。舉曰山南。厥後析爲東西。天漢之邦。實居右部。按梁州爲都會治所。領十有五州縣。道帶蠻夷。山川扼隴蜀。故二千石有採訪防禦之名。兵興多故。其任益重。澄清節鉞。二柄兼委。建中末。德宗南巡狩。偃翠華而徘徊。簫勺之音。洽於巴漢。戡難清宮。六龍言旋。迺下詔復除。征繇升州爲府。等威班制。與岐益同。地旣尊大。用人隨異。故自興元至大和五十年間。以勳庸佩相印者。

三以謨明歷真相者九。由台席授鉞。未幾復入相者再焉。磊落震耀冠於天下。去年夏四月。今丞相趙郡公徵還秦階。遂命左僕射燉煌公往踐其武。曩之九相及公而十焉。初公自河陽節度使入操國柄。其後鎮宣武。以禮悛獲悍。治天平以清去培克。居大鹵以仁蘇荐饑。今來是都。躡二三丈君子之躅。道同氣協。無所改更。如鼓和琴。布指成韻。羌夷砥平。旱麓發生。人無左言。樂有夏聲。俗既富庶。居多閒暇。圍視府局。素闕者補之。先是公堂嘗爲行殿。人不敢斥。別營候居。應門有閑。檠戟未具。公乃條白上言。詔下有司可其奏。軍門肅清。方有眉目。趨而入者。聳然生敬焉。惟梁山國也。其節用虎。出揚其威。入貯其潔。舊處仄陋。躡其雄稜。公遂分宅之別齋。且據便地。署曰節室。卜剛日乃遷焉。敬君命而壹民心。軍中增氣而知禮。戟衣旣垂。師節旣嚴。流眄屋壁。見前修之名氏。列於坐右。第以梁州刺史鼎興元尹記。與今稱謂不合。因發函進牘於不佞。且曰。我已飾東壁。以新志累子。於是按南梁故事。起自始登齋壇之後。爲記云。時開成二年。歲在丁巳。春二月某日記。

山南西道新修驛路記

開成四年。梁州牧缺。上玩其印。凝旒深思曰。伊爾卿族歸氏。以文儒再世居喉舌。今天官貳卿融。能嗣其耿光。嘗自內庭歷南臺尹。轂下政事。以試可爲元侯。乃付印綬。進秩大宗伯。兼御史大夫。玉節獸符。鎮於嬀墟。公拜手稽首曰。臣融敢揚王休於天漢之域。旣莅止。咨於羣執事。求急病者先之。咸曰。華陽黑水。昔稱醜地。近者嘗爲王所。百態丕變。人風邑屋。與山水俱一都之會。目爲善部矣。唯驛遞之途。歛危隘束。其

醜尙存。使如周道。在公頤指耳。於是因年有秋。因府無事。軍逸農隙。人思賈餘。乃懸墾山刊木之傭。募其力。揆攢鑿撞秘之用。庀其工具。舁輦舂鍤之器。膺其要。馨鼓以程之。糗醪以犒之。說使之。令旣下。奮行之。徒盆集。我之提封。踞右扶風。觸劍閣。千一百里。自散關抵褒城。次舍十有五。牙門將賈黯董之。自褒而南。逾利州。至於劍門。次舍十有七。同節度副使石文穎董之。兩將受命。分曹星馳。並山當蹊。頑石萬狀。坳者。埕者。兀者。銛者。磊落傾欹。波翻獸蹲。熾炭以烘之。嚴醴以沃之。潰爲埃煤。一簣可埽。棧閣盤虛。下臨谿。層崖峭絕。柄木亘鐵。因而廣之。限以鉤欄。狹逕深徑。銜尾相接。從而拓之。方駕從容。急宣之騎。宵夜不惑。郿曲稜層。一朝坦夷。與役得時。國人不知。繇是駛行者忘其勞。吉行者徐其驅。孿行者家以安。貨行者肩不病。徒行者足不繭。乘行者蹄不剝。公談私詠。溢於人聽。伊彼金其牛而誘之以利。曷若我子其民而來之以義乎。旣訖役。南梁人書事於牘。請紀之。以附於史官地理志。

劉賓客文集卷九

記

夔州刺史廳壁記

夔在春秋爲子國。楚并爲楚九縣之一。秦爲魚復。漢爲固陵。蜀爲巴東。梁爲信州。初城於瀘西。後周大總管龍門拓王公述一作龍門王公述登白帝歎曰。此奇勢可居。遂移府於今治所。是歲建德五年。隋初楊素以越公領總管。又張大之。唐興武德二年。詔書其以信州爲夔州。七年。增名都督府。督黔巫一十九郡。開元中。猶領七州。天寶初。罷州置郡。號雲安。至德二年。命嗣道王鍊爲太守。賜之旌節。統峽中五郡軍事。乾元初。復爲州。僭節於有司。第以防禦。使爲稱。尋罷。以支郡隸江陵。按版圖方輪。不足當通邑。而今秩與上郡齒。特以帶蠻夷故也。故相國安陽公乾曜嘗參軍事。修圖經。言風俗甚備。今以郡國更名。之所以然。著於壁云。凡名殊必以國事。建必以年。謹始也。長慶二年五月一日。刺史中山劉某記。

連州刺史廳壁記

此郡於天文與荊州同星分。田壤制與番禺相犬牙。觀民風與長沙同祖習。故嘗隸三府。中而別合。乃今最久而安得人統也。按宋高祖世。始析郴之桂陽爲小桂郡。後以州統縣。更名如今。其制誼也。郡從嶺州。從山而縣從其郡。邑東之望曰順山。由順以降。無名而相歆一作歆者。以萬數。回環鬱遠。迭高爭秀。西北朝

拱於九疑。城下之浸曰湟水。由湟之外。交流而合。輸以百數。淪漣汨瀟。壁山爲渠。東南入於海。山秀而高。靈液滲漉。故石鍾乳爲天下甲。歲貢三百銖。原鮮而臙。卉物柔澤。故紵蕉爲三服貴。歲貢十筥。林富桂楡。土宜陶旂。故候居以壯。聞石侔琅玕。水孕金碧。故境物以麗。聞環峯密林。激清儲陰。海風毆溫。交戰不勝。觸石轉柯。化爲涼颼。城壓赭岡。踞高負陽。土伯嘘溼。抵堅而散。襲山逗谷。化爲鮮雲。故罕罹嘔泄之患。亟有華皓之齒。信荒服之善部。而炎裔之涼墟也。永貞元年。余始以尙書外郎坐黨累。出補茲郡。居無何。吏議以是遷也。不足償其責。故道貶爲朗州司馬。後十年。詔書徵還。抵京師。俄復前命。佩故印綬而南。曩之騎竹馬北向相後者。咸任一作仕。郡縣巾幘來迎。下車之日。私言且笑。旣視事。得前二千石名。姓於壁端。宰臣王皎。倖卿劉晃。儒官嚴士元。聞人韓秦僉拜焉。或久於其治。功利存乎人民。或不之厥官。翹顛載於歌謠。余不佞從羣公之後。肇武德。距於今凡五十有七人。所舉者四君子。猶振裘之於領袖焉。元和十一年七月二十四日。刺史中山劉某記。

機汲記

瀕江之俗。不飲於鑿。而皆飲之流。予譎居之明年。主人授館於百雉之內。江水浩浩一作汜汜。周墉之間。一旦有工爰來。思以技自賈。且曰。觀今之室廬。及江之涯。間不容畝。顧積塊峙焉。而前耳。請用機以汲。俾盎然之狀。莫我遏己。予方異其說。且命之飾力焉。工也儲思環視。相面勢而經營之。由是比竹以爲畚。實於流中。中植數尺之臬。輦石以壯其趾。如建標焉。索綯以爲縲。縲於標垂。上屬數仞之端。互空以峻其勢。如張

弦焉。鍛鐵爲器。外廉如鼎耳。內鍵如樂鼓。牝牡相函。轉於兩端。走於索上。且受汲具。及泉而修。綆下絕。盈器而圓。軸上引。其往有建瓴之駛。其來有推轂之易。瓶緇不贏。如搏而升。枝長瀾出。高岸拂林杪。踰峻防。剝蟠木以承澍。貫修筍以達脈。走下潺潺。聲寒空中。通洞環折。唯用所在。周除而沃盥。以蠲入爨。而錡釜以盈。餽之餘。移用於湯沐。涑澣之末。泄注於圃畦。雖漢湧於庭。莫尙其需。洽也。昔予嘗登陴。攔然念懸流之莫可遽挹。方勉保庸。督臧獲。剡而挈之。至於裂肩龜手。然猶家人視水。如酒醪之貴。今也一任人之智。又從而信之。機發於冥冥。而利於用物。浩漑東流。赴海爲期。幹而遷焉。逐我頤指。曩之所謂阻且艱者。莫能高其高。而深其深也。觀夫流水之應物。植木之善建。繩以柔而有立。金以剛而無固。軸卷而能舒。竹圓而能通。合而同工。一作功斯所以然也。今之工咸盜其古先工之遺法。故能成之。不能知所以爲成也。智盡於一端。功止於一名而已。噫。彼經始者。其取諸小過歟。

洗心亭記

天下聞寺數十輩。而吉祥尤章章。蹲名山。俯大江。荆吳雲水。交錯如繡。始予以不到爲恨。今方弭所恨。而充所望焉。旣周覽讚嘆。於竹石間最奇處。得新亭。形焉如巧人畫。鼈背上物。卽之四顧。遠邇細大。雜然陳乎前。引人目去。求瞬不得。徵其經始。曰僧義然。嘯侶爲工。卽山求材。槃高孕虛。萬景坌來。詞人處之。思出常格。禪子處之。遇境而寂。愛人處之。百慮冰息。烏思猿情。繞梁歷榭。月來松間。彫鏤軒墀。石列筍簾。藤蟠蛟螭。修竹萬竿。夏含涼颺。斯亭之實錄云爾。然上人舉如意。挹我曰。旣志之。盍名之以行乎。遠夫。余始以

是亭園視無不適。始適乎目而方寸爲清。故名洗心。長慶四年九月二十三日。劉某記。

復荆門縣記

直故郢北步之道。其聚邑曰荆門。揭起重關。殿於樂都。名視縣內之制。居殷形束之要。故吏師重焉。通外民之底貢。會南藩之述職。故賓禮蕃焉。其肇允經營。實王孫昌夔居荆以表之。命行名建。而締構之弗暇。無幾何。有由勇爵而授。亦社於茲者。微一作馳名於省。齋謂相沿爲非智。因請罷去其號。發踐更以董之。有司不能端究事本。循空言而可其奏。繇是分地征以歸它邑。野之人有回遠之歎。廢文吏而顯戍督。行之旅有誰何之難。是利不及下也。黎民病之。自鄢而南。斯爲畫疆。抵郡之路。貫其七舍。持瑞節而銜急宣之使。蓋陰相交。遂使服縵胡者。備問俗之對。執刀七者。申餼牽之禮。是敬之不及賓也。君子病之。如是幾二十歲。距永貞元年。江陵尹裴公政成上游。德及於人。大建長利。俾無遺害。乃外濟羣欲。內張全模。周圖經制。條白於狀。昌言旣從。公議攸同。忘勞之徒。樂用之工。載大其門。一作載高其墉。徑術脈分。闔門架空。然後析便地以肥之。建具官以司之。糜羨財以償其力役。汰冗食以資其秩稍。田里不聞於徵令。縣官無減於歲入。越某月。旣成而落之。官修其方。人樂其居。將迎犒飫之儀展。廡置符繻之事舉。戍夫有五。公吏有職。由彙而分。率無踰閑。入其封者。可以知教。元和元年。四海會同。天子命公師長南宮。三年。公以介圭入覲。途出斯邑。邑人之華皓幼童。咸須於道。周距躍而謠曰。起我堙廢而完之。徠我蕩析而安之。昔室於墟。風搖雨濡。自公優柔。鄂閭盈兮。昔飲於滄。夏溷冬枯。自公感通。鬻沸生兮。淑旂之華兮。四牡之駢。僂公

之還兮。觴以祝之。卻路躡蹠。百形一音。公爲駐蹕衡而勞之。有以文從公者。紀事於牘。且曰。民可懷也。盍命夫學舊史之事以志焉。公不得讓而從之。走是以有授簡之辱。初公以縣之方便聞於上也。禹錫方以郎位貼職。干計曹章下之日。得以省事。逮今以遷人獲宥於善部。工休之日。得以踐履。故於拜命無牢讓。於傳信無愧詞。以爲古之創物建庸。宜於人民而得其時者。則必誦其事功爲後代法。雅有營謝。美召伯也。傳稱城沂。賢蔞教也。賦水泉原隰之狀。志慮事命日之規。當書而詠之。細亦弗可略也。是用謹其本始。而存乎篇。俾後之視今者。知楚郊之令典云。

武陵北亭記

郡北有短亭。繇舊也。亭孤其名。地藏其勝。前此二千石全然見之。建言而莫踐。去之日。率遺恨焉。七年冬。詔書以竹使符授尙書水曹外郎竇公常。曰。命爾爲武陵守。莅止三月。以碩畫佐元侯平裔夷。降渠魁。又三月。以順令率蒸民增水坊。表大^{一作}道。是歲大穰。明年政成。農緣畝以勇勸。工執技以思賈。因民之餘力。乘日之多暇。乃顧其屬曰。郊道有候亭。示賓以不恩也。雖聞茲地。輶美未發。豈有待邪。自吾之治於斯也。購徒庀材。大起堙廢。未嘗植私庭。龔燕寢。役必先公。人不余瑕。調賦幸均矣。城池幸完矣。而重浹辰之役。掠苟簡之間。卒使勝躅冒沒。猶璞而不攻。懼換符之日。還復齋恨。無乃遺誚於來者乎。言得其宜。智愚同贊。於是撤故材以移用。相便地而居要。去凡木以顯珍茂。汰污池以通淪漣。自天而勝者。列於騁望。由我而美者。生於頤指。箕張筵楹。股引房櫺。斧斤息響。風物異態。大道出乎左藩。澄湖浸乎前垠。仙舟祖軼。

繇是區處。九月壬午。工告休。亭長受成。赤車威遲。於以落之。肅賓而入。圍視有適。沈水北澳。陽山南麓。旣
焉遽遽。雄殿郊隅。前軒舒陽。朱檻環之。舞衣回旋。樂籥參差。北廡延陰。外阿旁注。芊眠清泚。羅入洞戶。初
筵修平。彫俎靜嘉。林風天籟。與金奏合。亦旣醉止。州從事舉白而言曰。室成於私。古有發焉。矧成於公。庸
敢無詞。觀乎棼楣有嚴。丹牖相宣。象公之文律。曄然而光也。望之宏深。卽之坦夷。象公之酒德。溫然而達
也。庭芳萬本。跗萼交映。如公之家肥熾而昌也。門闢戶闔。連機弛張。似公之政經便而通也。因高而基。因
下而池。躋其高可以廣吾視。泳其清可以濯吾纓。俯於遠。惟行旅謳吟是采。瞰於野。惟稼穡艱難是知。雲
山多狀。昏旦異候。百壺先常之餞迎。退食私辰之宴嬉。觀民風於嘯詠之際。展宸戀於天雲之末。動合於
誼。匪唯寫憂。公曰。夫言之必可書者。公言也。從事不以私視予。余從而讓之。是自遠也。其可乎。迺授簡於
放臣。俾書以示後。後之思公者。雖灌叢萑草。尙勿翦拜。矧翬飛之革然。石刻之隱然歟。

劉賓客文集卷十

書

上杜司徒書 時元和元年

月日故吏守朗州司馬員外置同正員劉某謹齋沐致誠命僕夫持書敢獻於司徒相公閣下昔稱韓非善著書而說難孤憤尤爲激切故司馬子長深悲之爲著於篇顯白其事夫以非之書可謂善言人情使逢時遇合之士觀之固無以異於它書矣而獨深悲之者豈非遭罹世故益感其言之至邪小人受性顯蒙涉道未至末學見淺少年氣粗常謂盡誠可以絕嫌疑徇公可以弭讒愬謂慎獨防微爲近隘謂艱貞用晦爲廢忠芻狗已陳刻舟徒識罟獲隨足悵然無知事去凝想時時自笑然後知韓非之善說司馬子長之深悲跡符理會千古相見雖欲勿悲可乎大凡恆人之所以靈於庶類以其能羣以勝物也烈士之所以異於恆人以其伏節以死誼也然則交相喪者世與道難合并者機與時是以有死誼之心而卒不獲其所者世人悲之獲其所矣而一旦如不得終焉者君子悲之世人之悲悲其不遇無成而虧故其感也近君子之悲悲其不幸既得而喪故其感也深其悲則同其所以爲悲則異若小人者其不幸歟間者昧於藩身推致危地始以飛謗生釁終成公議抵刑旬朔之間再投裔土外黷相公知人之鑑內貽慈親非疾之憂常恐恩義兩乖家國同負寒心銷志以生爲慙雖欲瀝血以自明籲天以自訴適足來衆多之

請。豈復有特達見知者邪。遂用詛盟於心。不復自白。以內咎爲弭謗之具。以吞聲爲窒隙之媒。庶乎日月至焉。而是非乃辨。會友人江陵法曹掾韓愈。以不幸相悲。且曰。相國扶風公之遇子也厚。非獨余知之。天下之人皆知之矣。余聞初子之橫爲口語所中。獨相國深明之。及不得已而退。則爲之流涕以訣。又不得已而譴。則爲之擇地以居。求之於今。難與侔矣。抑余又聞曩子之介於司徒府。奉誠敬於山園。上公亟稱於人。以爲不懈於位。今則有修儀以贊其詔相者。有備物以贊其容衛者。七月禮畢。一朝慶行。誥言敬之。授以顯秩。子獨足趾一跌。而前勞併捐。祝網之辰。動經疎目。可封之代。乃爲窮人。斯常情之所悲。矧知子之厚者。夫踣者思起。必諄而求拯。疾者思愈。必呻而求醫。子宜諄於有力。而呻於有術。如何以箝口自絕。爲智以甘心受誣。爲賢。曠然自咎。求知於默。彼李斯逐焉。而爲上卿。鄒陽囚焉。而爲上客。二子者。豈默以求知者邪。若可訴而不言。則陷於畏。可言而不辯。則鄰於怨。畏與怨。君子之所不處。子其處之哉。韓生之言。未及竟。而小人不知感從中來。始赧然以愧。又缺然以慄。終悄然以悲。悲斯歎。歎斯憤。憤必有泄。故見乎詞。敢聞左右。投所閱也。嗟。夫人之至信者。心目也。天性者。父子也。不惑者。聖賢也。然而於竊鈇。而知心目之可亂。於掇蜂。而知父子之可間。於拾煤。而知聖賢之可疑。況乎道謝孔顏。恩異天性。是非之際。愛惡相攻。爭先利途。虞相軋。則釁起。希合貴意。雖無嫌。而謗生。魯酒致邯鄲之圍。飛鳶生博者之禍。伯仁之殺。由偶對。伯奢之冤。以吞聲。動罹險中。皆出意表。雖欲周防。亦難曲施。加以吠聲者多。辨實者寡。飛語一發。臚言四馳。萌芽始奮。枝葉俄茂。方謂語怪。終成禍梯。嗚呼。人必求知。不能自達。何投分放節。有積塵之難。

何譖行愛弛。有決防之易。何將進之日。必自見其可。而後親。何將退之時。乃人言其否。而遂棄。良由邪人必微。邪謀必陰。陰則難明。微則易信。罔極大甚。古今同途。是以前修鑒其若此。姑以推心取信。不以循迹生嫌。由是求忠臣於孝子。求良婦於罵己。食子盡節也。推其忍。可以疑心。放廢違命也。推其仁。可以屬國。若謂其孝於親。未必能忠。專於夫。未必能貞。忍於子。未必能忍於其它。仁於獸。未必能仁於其類。則是天下之人。盡不可信。而盡可誣。固不然也。凡人之行。已必恆於所安。苟非狂易。不能甚異。小人自居門下。僅踰十年。未嘗信宿而不侍坐。率性所履。固無遁逃。言行之間。足見真態。伏惟推心以明其迹。追往以鑒於今。苟謂其嘗掩人以自售矣。嘗近名以冒進矣。嘗欺謾於言說矣。嘗吝貪於求取矣。嘗狎比其瑣細矣。嘗媒孽其僚友矣。嘗矯激以買直矣。嘗詆譎以取容矣。嘗漏言於咨諏矣。嘗敗務於簿書矣。有一於此。雖人謂其賢。我得而刑也。豈止於棄乎。苟或反是。雖人謂其盜。我得而仕也。庸可而棄乎。由是而言。小人之善否。不在衆人。所以受譴已還。行及半歲。當食而歎。聞弦尙驚。不以衆人之善爲是非。唯以相公之意爲衡準。自違間左右。亟蒙簡書。慰誨勤勤。窮頓增感。伏想仁念必思有以拯之。況禮道貴終。人情尙舊。嘗盡其力。必加以仁。於犬馬之微。有帷蓋之報。顧異於是。豈無庶幾。儻浮言可以事久而明。衆嗤可以時久而息。弘我大信。以祛羣疑。使煢煢微志。無已矣之歎。覲乎異日。得夷平民。然後裹足西向。謝恩有所。復以塵纓薰貌。稱故吏於相門。此言朝途。可以夕死。何則。復於變者。其義重。拯於危者。其感深。睽而後合。示終不可睽也。否而後泰。示終不及否也。獲寶於已喪。得途於旣迷。與夫平居不爲艱。故所激者。其味異矣。伏以大

君繼明。元宰柄用。鴻鈞播平分之氣。懸象廓無私之照。渙汗大號。與人惟新。昭回汪濊。旁下郡國。投荒爲民者。咸釋莘桔。遂還里閭。繫於稍食。猶在羈絆。伏讀敕令。許移近郊。今武陵距京師。贏二千者無幾。小人祖先壤樹。在京索間。瘠田可耕。陋室未毀。濡露增感。臨風永懷。伏希閱其至誠。而少加推恕。命東曹補吏。置籍於滎陽伍中。得奉安輿。而西拜先人松檟。誓當齋志沒齒。盡力於井。昀一作之間。斯遂心之願也。如或官謗未塞。私欲未從。雖爲裔民。乃有善地。則北距澧浦。資宿春而可行。無道途之勤。獨僕貨之費。重以鎮南。用和輔理。扇仁風於上游。霽嚴施惠。得以自遂。斯使家之願也。伏惟降意詳察。擇可行者處之。乞思於指顧之間。爲惠有生成之重。雖百穀之仰膏雨。豈踰其急焉。嗟哉小生。仕逢聖日。豈曰不辰。知有相君。豈曰不遇。而乘運鍾否。俾躬罹災。同生無手足之助。終歲有病貧之厄。孰不求達而獨招嫌。孰不求安而獨乘坎。賦命如此。雖悔可追。湘沅之濱。寒暑一候。陽鴈纔到。華言罕聞。猿哀鳥思。啁啾響異。莫夜之後。併來愁腸。懷鄉倦越。吟之苦。舉目多似人之喜。俯視遺體。仰安高堂。悲愁惴慄。常集方寸。盡意之具。固不在言。身遠與寡。捨茲何託。是以因言以見意。恃舊以求哀。敢希末光。下燭幽蟄。孤志多感。重恩難忘。願瞻門館。慙戀交會。伏紙流涕。不知所云。禹錫惶悚再拜。

獻權舍人書

禹錫在兒童時。已蒙見器。終荷薦寵。始見知名。衆之指目。忝閣下門客。懼無以報稱。故厚自淬琢。靡遺分陰。乃今道未施於人。所蓄者志。見志之具。匪文謂何。是用顛顛懇懇。於其間思有所寓。非篤好其章句。沈

溺於浮華。時態俗尙。病未能也。故拙於用譽。直繩朗鑒。樂所趨也。故銳於求益。今謹錄近所論撰。凡十數篇。靳端較是非。敢關於左右。猶夫礦朴納於鎔範。嘗聞昔宋廣平之沈下僚也。蘇公味道時爲繡衣直指使者。廣平投以梅花賦。蘇盛稱之。自是方列於聞人之目。是知英賢卓犖。可外文字。然猶用片言。借說於先達之口。席其勢而後驥首當時。矧碌碌者。疇能自異。今閣下之名之位。過於蘇公之曩日。而鄙生所賦。或鉅於梅花。則沈泥千霄。懸在指顧間。其詞汰而喻僭。誠黷禮也。緊游藩之久。說尙舊而震嚴。禹錫惶悚再拜。

爲京兆李尹答于襄州第一書

閣下以天墓世在三原。而去河南益遠。尙繫於數百年之外。於義不安。遂奮然移羣從。率先行古。占數爲京兆人。且命使者修敬於鄙薄。缺然不敢當此之重。洪惟閣下。世雄朔易。四姓之冠。其宗勳有八柱之貴。其碩德有三老之重。因都人錮。錫之土田。自生齒已上。列於侯籍。與夫其先嘗爲編戶民者。大殊。謹按永徽格。貫在兩都者。無害爲本部官。蓋神州赤縣。尊有所厭。非它土之比。實待罪輦轂下。閣下宣風江漢。爲諸侯師。介主人覲。必參大政。其展禮措事。宜爲羣倫所觀。非據之榮。赧然汗下。不宣。實再拜。

第二書

實白前辱閣下書。厚自枉屈。執州人之禮。兼示移羣從書。明所以去河南從京兆爲望之旨。於古儀爲得。然而通行之自久。或獻疑焉。是以前書不敢不逶巡牢讓。亦有以發閣下之雄辨。使矚然爲世程者。今月

某日函使至。果貽理言。大明時人之所以失。而我獨障頽波而逢其原。既一辭不獲命。又學淺不堪往復。敢不敬從。前史稱以大將軍而有揖客。豈不爲重。循汲直之言。則有以略其禮而增高者。今鄙人之不讓。適有以增閣下之重耳。實白。

答饒州元使君書

傳使至。蒙致書一函。辱示政事與治兵之要。明體以及用。通經以知權。視陰陽慘舒之節。取震虩澤濡之象。知天而不泥於神怪。知人而不遺於委瑣。先鄉社之治。以決於舉郡。首隊伍之法。以及於成師。猶言數者起一。而至萬。揉律者本黃鐘以極八音。誠通人之說。章章必可行者也。鄙生涉吏日淺。嘗耳剽老成人之言。熟矣。今研覈至論。淵乎有味。非游言架空之徒。喜未嘗不至拊也。故揚摧所見。以累下執事云。蓋豐荒異政。繫乎時也。夷夏殊法。牽乎俗也。因時在乎善相。因俗在乎使安。不知發斂重輕之道。雖歲有順成。猶水旱也。不知日用樂成之義。雖俗方阜安。猶蕩析也。徒木之信必行。則民不惑。此政之先也。置水之清必勵。則人知敬。此政之本也。絃筦之機或行。則姦不敢欺。此政之助也。則有以其弛張雄雌。唯變所適。古之賢而治者。稱謂各異。非至當有二也。顧遭時不同耳。夫民足則懷安。安則自重。而畏法。乏則思濫。濫則迫利而輕禁。故文景之民厚其生。爲吏者率以仁恕顯。武宣之民亟於役。爲吏者率以武健稱。其寬猛迭用。猶質文循環。必稽其弊而矯之。是宜審其救奪耳。太史公云。身修者官未嘗亂也。然則修身而不能及治者有矣。未有不自己而能及民者。今之號爲有志於治者。咸能知民困於杼柚。罷於征徭。則曰司牧之

道莫先於簡廉奉法而已。其或材拘於局促，智限於罷懦，不能斟酌盈虛，使人不倦，以不知事爲簡，以清一身爲廉，以守舊弊爲奉法，是心清於棖闡之內，而柄移於胥吏之手。歲登事簡，儉可理也。歲札事叢，則潰然攜矣。故曰：身修而不及理者有矣。若執事之言政，諳理切情，斥去迂緩，簡而通，和而毅，其修整非止乎一身，必將及物也。其程督非務乎一切，必將經遠也。坊民之理甚周，而不至皎察，字民之方甚裕，而不使侵蟻。知革故之有悔，審料民之多撓，厚發姦之賞，峻欺下之誅，調賦之權，不關於猾吏，逋亡之責，不遷於豐室。因有年之利以補敗，汰不急之用以蓄財，爲邦之要，深切著明。若此，其悉也。推是言，按是理而篤行之，烏有不及治耶？古稱言之必可行，非樂垂空文耳。有人民社稷，固可踐其言也。瀕江之郡，饒爲大履，番君之故地，漸甌越之遺俗。餘干音翰有畝鍾之地，武林有千章之材，其民牟利鬪力，狃於輕悍，故用暴虐，開重以山茂檣楛，金豐鏐銑，齊民往往投鋌基而卽鑿鑄，損絲枲而工搯擷，乘時詭求，其息倍稱。間聞主分土者，盡籠其利而幹之，坐簿書舛錯，爲中執法所劾，事下三府，以受賂論，其刑甚渥。於今列郡不寒而慄，彼邦人聆其風聲，固曰：彼浚民者，上罪之若此，其念民也至矣。今二千石以前失職，非其罪，執事者卽人心而用之，彼邦人是必翹然須其至而安矣。以思治之民，遇習治之守，欲不至於富庶得乎？昌黎韓宣英好實蹈中之士也。前爲司封郎，以餘刃刺劇於計曹，號無逋事，能承其家法而紹明之，庭堅仲容之族也。坐事爲彼郡司馬，更聞餘者再焉，是必能知風俗之良窳，采察之善否，盍嘗問焉，足爲羣疑之寶龜也。至於否臧之律，戢玩之戒，均權以制勳，函隸以稔勇，平居使不墮，萃聚使不譁，坐作疾徐，心和氣振，誠織

悉於所示也。故置之。以須執事異日承進律之命。握獸符而駕寅車。然後貢其誓言。重曉左右耳。

答容州寶中丞書

健步劉子良至。猥奉書教。以愚爲希儒之徒。重言一發。華袞非貴。世之服儒衣冠。道古語。居學官者。爲不鮮矣。求其知所以然者。幾何人。借曰有之。未必不詬病耳。今夫挾弓注矢。遡空而發者。人自以爲皆羿可矣。移之於澤宮。則噤而不敢言。何哉。有的不可欺故也。今夫儒者。函矢相攻。蝸蟻相喧。不啻於穀弓射空矢矣。孰爲其的哉。異日兄道大行。則言益重。使儒者之的。懸於舌端。不得讓也。由是知辱教之喜。可勝既乎。間承得一二易生。列侍絳帳。荒服之外。持經鼎來。爭捐珠璣。以易編簡。不疾而速。其君子之德風歟。南裔憬俗。已丕變矣。顧其風候。非民和可移。地泄恆燠。冬無嚴氣。其在嗇神以佑藥。兼味以禦禳。所謂養賢以及萬民。頤之時義。不可不順。苟以有待及物爲心。則養己與養民。非二道也。矧羣情之顛顛乎。禹錫再拜。

答柳子厚書

禹錫白。零陵守以函置足下書。爰來屑末三幅。小章書僅千言。申申疊疊。茂勉甚悉。相思之苦懷。膠結贅聚。至是泮然以銷。所不如晤言者無幾。書竟獲新文二篇。且戲余曰。將子爲巨衡。以揣其鈞石銖黍。余吟而繹之。顧其詞甚約。而味齋然。以長氣爲幹。文爲支。跨躒古今。鼓行乘空。附離不以鑿柄。咀嚼不以文字。端而曼。苦而腴。佻然以生。矜然以清。余之衡誠懸於心。其揣也如是。子之戲余。果何如哉。夫矢發乎羿。穀

而中微存乎它人。子無曰必我之師而能我衡。苟能則譽羿者皆羿也。可乎。索居三歲。俚言蕪而不治。臨書輒不具。禹錫白。

與柳子厚書

間發書得箏郭師墓誌一篇。以爲其工獨得於天姿。使木聲絲聲均其所自出。抑折愉釋。學者無能如繁休伯之言。薛訪車子不能曲盡如此。能令鄙夫沖然南望。如聞善音。如見其師。尋文寤事。神驚心得。倘伴伊鬱久而不能平。嗟夫。郭師與不可傳者死矣。弦張柱差。楚宜反枵然貌存。中有至音。含糊弗聞。噫。人亡而器存。布方册者是已。余之伊鬱也。豈獨爲郭師發邪。想足下因僕書重有槩耳。不宣。禹錫白。

答道州薛郎中一作侍郎論方書書

禹錫再拜。初兄出中臺守江華。人咸曰。函牛之鼎。以之烹小鮮。惜乎。餘地澶漫而無庸也。愚獨心有槩焉。以爲君子受乾陽健行之氣。不可以息。苟我位不足以充我道。是宜寄餘術百藝。以洩神用。其無暇日與得位同。久欲以是理求有得於兄。而未有路。會崔生來。辱書教。果惠以所著奇方十通。尚古今之宜而去其并猥。以一物足以了病者居多。非累試輒效。不在是族。或取諸屑近。亦以攜拾。慮恆人多怠忽不省。必建言顯白。揚其功於已。然其它立論。率以弭病於將然爲先。而攻治爲後。言君臣必以時。言宜補必以性。言砭火必本其輪榮。言祓禳必因其風俗。齊和之宜。炮剝之良。暴炙有陰陽之候。煎烹有少多之取。撓高反勞以制駛。一作撓勞。以制駛。露置以養潔。味有所走。薰有所歸。存諸纖悉。易則生患。非博極遐覽之士。孰能知

其所從來哉。愚少多病。猶省爲童兒時。夙具襦袴。保姆抱之。以如醫巫家。鍼烙灌餌。咍然啼號。巫嫗輒陽陽滿志。引手直求。竟未知何等方。何等藥餌。及壯。見里中兒年齒比者。必睨然武健可愛。羞己之不如。遂從世醫號。富於術者。借其書伏讀之。得小品方。於羣方爲最古。又得藥對。知本草之所自出。考素問。識築衛經絡百骸九竅之相成。學切脈以探表候。而天機昏淺。布指於位。不能分累黍之重輕。第知息至而已。然於藥石不爲惜矣。爾來垂三十年。其術足以自衛。或行乎門內。疾輒良已。家之嬰兒。未嘗詣醫門求治者。頃因欲編次已試者爲一家方書。顧力不足。今兄能我先。所以辱睨之喜。信踰拱璧。有以賞音適道耳。常思世人居平不讀一方。病則委千金於庸夫之手。至於甚殆。而曰不幸。豈真不幸邪。甚者或乘少壯之氣。笑人言醫。以爲非急。昌言曰。飴口飽腹。藥其如我何。所承之氣。有時而旣。於禱神佞佛。遂甘心焉。兄以愚言覆觀之。其人固比肩耳。前家示藥焙法。謹如教地之慝。果不能傷。雖此音柴。胡水瀉喜速朽者。率久居而無害。萬物不可以無法。謂生不由養。致其誣乎。山川匪遐。事使之遠。形不接而諭者。莫賢乎書。臨紙悵悵。不宜。禹錫再拜。

與刑部韓侍郎書

退之從丞相平戎還。以功爲第一官。然猶義一作議者。噤然如未遷陟。此非特用文章學問。有以當衆心也。乃在恢廓器度。以推賢盡材爲孜孜。故人心樂其道。行必及物。故耳。前日赦書下郡國。有棄過之目。以大國材富。而失職者多。千鈞之機。固省度而釋。豈驥鼠所宜承當。然譬諸蟄蟲。坯戶而俯者。與夫稿死無

以異矣。春雷一振，必歆然翹首，與生爲徒。況有吹律者召東風以薰之，其化也益速。雷且奮矣，其知風之自乎？旣得位當行之，無忽禹錫再拜。

答連州薛郎中論書儀書

我兄不知愚無似，猥以書見攻其非。且曰：我與子中外屬當爲伯仲，其抵我書，執禮太卑。按舊儀，凡兄弟之齒，有唯無伏，它以是爲衰。其於匹敵，卽前云願，後云白而已。大歷初，李贊皇賈常侍猶守之無渝。二公何人也？我與子何人也？烏有從末俗以姑息爲禮，而不虞識者所窺邪？其旨云爾。愚得書退而思惟，愀然自賀曰：在恆人爲宜，而在愚爲過，豈不甚幸歟！故盡言於兄，期有以相暢耳。夫禮之文，爲著定宜尊宜卑，猶四方上下，左右前後，稱謂一立。古先聖賢所不敢移，管敬仲不敢當命鄉之饗，虞人不敢承士之招，先禮而後身也。汲黯不爲大將軍而虧九卿，王祥不爲錄尙書而屈三公，先道而後時也。是則非據之榮，雖君命有所不受，非道之利，雖衆尙有所不爲。兄長於大歷初，嘗接前輩游，故其風采去承平時不甚相遠。愚長於貞元中，所與游皆後來諸生，然猶於稠人廣坐，時聞老成人之說，灌注耳目，斑斑然不絕如綫。其後爲御史，四方諸侯悉以書來賀，校其禮皆駁不同。唯洪州牧李常侍異。潭州牧楊中丞憑，始言執事，其它如儀，而同在憲司者，咸以二牧爲不遜。愚時與其僚柳宗元昌言於衆曰：監察八品也，當衣碧，言執事爲宜，不當經怪。衆咸听然而哈，復謂愚云：子奚不碧其服邪？其不堪執事色深，不可以言解。及謫官十年，居僻陋不聞世論，所以書相問訊，皆昵親密友，不容變更。而時態高下無從知耳。前年祇召抵京師，偶故

人席夔談。因及是事。乃知與十年前大殊。至有同姓屬尊致書於屬卑而貴者。其紙尾言起居新婦。夔獨竊笑之而已。然猶不敢顯言詆之。今有人謂東爲西者。一言發則凡人嗤爲駭且狂。苟不衆非之。則東西易位久矣。尊卑失其儀。恬而不怪。安得使人如東西不敢易之哉。曾子有云。君子之愛人也。以德。細民之愛人也。以姑息。謂古人悉朴且賢。則斯言不當發於洙泗間耳。蓋三代之尙。未嘗無弊。由野以至僿。豈一日之爲。漸靡使之然也。嫉其弊而救之以歸於中道。以俟乎薦紳先生德與位并者。揭然建明之。斯易也。語曰。俟自直之箭。則百代無一矢。俟自圓之木。則千歲無一輪。執矯揉之器者。視之灌叢。無非良材耳。竊觀今之人。於文章無不慕古。甚者或失於野。於書疏獨陋古而汨於浮。二者同出於言而背馳。非不能盡如古也。蓋爲古文者得名聲。爲今書者無悔吝。如水走闕爲闕

